

KABA MAMAK SI HETONG

Direktorat
Kebudayaan

-44



DEPARTEMEN PENDIDIKAN DAN KEBUDAYAAN

KABA MAMAK SI HETONG

Dari
MUSIUM NASIONAL

Alih Aksara
EDWAR DJAMARIS

PERPUSTAKAAN
DIREKTORAT SEJARAH &
NILAI TRADISIONAL

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1985

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

PERPUSTAKAAN
DIT. SEJARAH & NILAI TRADISIONAL

Nomor Induk : 1526/1986.
Tanggal terima : 20 - 5 - 86.
Tanggal catat : 18 - 7 - 86
Penerima dari : PRO DEXI BUK SASTRA
Nomor buku : 1004 DAERAH
Copi ke : 1

DAFTAR ISI

Kata Pengantar	9
Pendahuluan	11
1. Latar Belakang	11
2. Fungsi Cerita	13
3. Singkatan Isi Cerita	14
Alih Aksara	21
Daftar Pustaka	104

KATA PENGANTAR

Berbahagialah kita karena kita mempunyai khazanah kesusastraan daerah yang beraneka ragam. Oleh karena itu sepanasnya alah kita merasa bertanggung jawab untuk menggalakkan kembali sastra daerah kita yang sudah lama kita tinggalkan, apalagi generasi muda yang tidak begitu mengetahui dan berminat terhadap sastra daerah. Cerita daerah itu bermacam-macam jenisnya. Ada yang berupa adat istiadat, kerajaan, cerita rakyat dan lain-lain.

Buku yang berjudul *Kaba Mamak si Hetong* ini adalah sebuah cerita klasik Minang tentang Cerita-rakyat.

Dalam cerita ini dilukiskan bagaimana kesudahannya dari sikap seorang pemimpin yang angkuh dan sombong dan suka menghina orang yang miskin akhirnya dapat dijatuahkan oleh seorang anak yang masih kecil karena dia berdiri dipihak yang benar.

Naskah ini tersimpan di Musium Nasional ditulis dengan huruf Araf Melayu yang dialih-aksarkan oleh Sdr. Drs. Edwar Djamaris.

Semoga buku ini ada manfaatnya bagi masyarakat Minang khususnya dan Bangsa Indonesia umumnya untuk melestarikan sastra daerah.

Jakarta, Oktober 1984

Penyunting

KATA PENGANTAR

Hasil sastra Minangkabau yang sudah terbit maupun berupa naskah tulisan tangan terbatas jumlahnya. Hasil sastra Minangkabau lama umumnya disampaikan secara lisan dan belum banyak dituliskan dan diterbitkan. Kebetulan kami menemukan sebuah buku cerita Minangkabau yang sudah tua di Perpustakaan Nasional, di Museum Nasional terbitan PWM Traø, Leiden. tahun 1892 dengan huruf Arab-Melayu, berjudul *Kaba Mamak si Hetong : Eene Minangkabausche Vertelling*. Memang pada masa itu abad ke-19ssampai awal abad ke-20 karya sastra Melayu atau Minangkabau ditulis dan diterbitkan dengan huruf Arab-Melayu karena pada waktu itu orang Melayu belum begitu biasa menggunakan tulisan Latin.

Kita pantas mengucapkan terima kasih atas usaha pemerintah Belanda waktu itu yang telah berjasa menerbitkan *kaba* Minangkabau ini walaupun dalam tulisan Arab-Melayu sehingga kita dapat mengenalnya, membacanya, dan mengolahnya lebih lanjut untuk kepentingan pengembangan sastra Minangkabau khususnya dan sastra Nusantara umumnya.

Cerita ini belum pernah terbit dalam tulisan Latin. Di samping itu, mengingat sudah lamanya *kaba* ini diterbitkan di luar negeri, Leiden, Negeri Belanda, timbul keinginan kami untuk mengalihaksarakan *kaba* ini ke dalam tulisan Latin agar warisan sastra ini dikenal oleh masyarakat Indonesia secara luas. Dan penelitian lebih lanjut dapat pula dilakukan.

Pada kesempatan ini kami ingin menyampaikan terima kasih yang sebesar-besarnya kepada Pimpinan Proyek Penerbitan Buku Bacaan Sastra Indonesia dan Daerah yang bersedia menerbitkan naskah hasil alih aksara ini.

Atas perhatian dan bantuan berbagai pihak yang tidak kami sebutkan satu persatu di sini, kami ucapkan terima kasih yang sebesar-besarnya.

Jakarta, 5 Mei 1984

Edwar Djamaris.

I. PENDAHULUAN

1.1 Latar Belakang.

Kaba Mamak si Hetong ini kami temukan berupa sebuah buku tua di Museum Nasional dalam tulisan Arab-Melayu diterbitkan di Leiden oleh penerbit PWM tahun 1892 berjudul *Chabar Mama' Si Hetong* : eene Minangkabausche Vertelling. Cerita ini belum pernah terbit dalam tulisan Latin sehingga *kaba* ini tidak begitu dikenal oleh masyarakat maupun peneliti sastra Minangkabau. Di samping itu, mengingat sudah lamanya *kaba* ini diterbitkan dan di luar negeri pula, timbul keinginan kami untuk mentransliterasikan *kaba* ini ke dalam tulisan Latin agar warisan sastra ini dapat dikenal oleh masyarakat secara mudah dan luas. Inilah yang mendorong kami menyajikan transliterasi *kaba* ini.

Isi ceritanya cukup menarik yaitu kisah percintaan antara seorang putri raja yang kaya raya dengan seorang pemuda miskin dari golongan rakyat jelata. Sudah barang tentu percintaan yang tidak seimbang ini akan mengalami banyak rintangan dan hambatan yang tidak sedikit bahkan sampai mengakibatkan peristiwa tragis, yaitu Kasumbo Hampai pernah jatuh dan hidup di dalam ngarai dan pernah pula bunuh diri tetapi akhirnya dapat kawin juga dengan bahagia.

Dengan demikian *kaba* Mamak si Hetong ini dapat kita golongkan cerita pelipur lara. Salah satu ciri cerita pelipur lara itu ialah suatu cerita yang pada mulanya banyak peristiwa yang menyedihkan, pengembalaan, dan penderitaan lahir dan batin tetapi akhirnya hidup bahagia.

Cerita yang sejenis dengan cerita ini dalam sastra Minangkabau, di antaranya, yaitu *Kaba si Untuang Sudah*, *Kaba Magek Manandin*, *Kaba Malin Deman*, dan *Kaba si Umbuik Mudo*.

Dalam cerita ini terasa pengaruh Hindu amat menonjol. Ciri pengaruh Hindu dalam cerita ini antara lain, pertama, adanya ben-

da keramat lagi sakti yang mempunyai kekuatan yang luar biasa yaitu cincin cinto-cinto yang diberikan oleh naga kepada Kasumbo Hampai ketika ia berada dalam ngarai. Cincin cinto-cinto ini dapat digunakan untuk memanggil burung borak. Burung borak ini dapat disuruh oleh Kasumbo Hampai ke mana saja yang diinginkan oleh Kasumbo Hampai. Kedua, orang setelah mati dapat hidup kembali. Kasumbo Hampai sudah mati karena bunuh diri dan sudah dikuburkan orang dapat dihidupkannya kembali oleh Mamak si Hetong dengan bantuan neneknya yang keramat yang berkubur di Bukit Gombak. Hal ini mengingatkan kita kepada Maharaja Wur-gadewa yang tewas dalam peperangan dihidupkan kembali oleh Bagawan Narada dengan menggunakan "Air Sempayang Mertajiwa" dalam cerita *Hikayat Pandawa Lima*. Ketiga, talang perindu dan kelapa ajaib yang digunakan oleh Mamak si Hetong untuk menggoda Kasumbo Hampai yang pernah menghinanya itu hingga Kasumbo Hampai berbalik menjadi mencintai Mamak si Hetong.

Sedang unsur Islam boleh dikatakan sedikit sekali dalam cerita ini. Adanya unsur Islam dalam cerita ini terlihat dalam doa yang menyebut nama Allah dan Rasulullah. Namun dalam doa itu Mamak si Hetong meminta pertolongan kepada neneknya yang sudah meninggal sehingga janggal sekali rasanya. Perhatikanlah doanya itu di bawah ini.

*"Ya Allah ya Rasulullah
Ya Sayyidi ya Maula
Ya Tuhanku junjungan denai
Inyiak janyo den di Inyiak
Bakubua di Bukik Gombak
Kok lai bak hiduik bak mati
Mati buliah urang baniaek
Hiduik bakeh urang batanyo
Palakanlah pinto den
Kok lai malu ka tabangkik
Gadang nak baganti-ganti
Cadiak nak sakali surang
Hiduikkanlah Kasumbo Hampai"*

Terjemahannya :

'Ya Allah ya Rasulullah
Ya Sayyidi ya Maula

Ya Tuhan junjungan hamba
Kakek hamba wahai Kakek hamba
berkubur di Bukik Gombak
Jika ada seperti hidup seperti mati
Mati tempat orang berkaul
Hidup tempat orang bertanya
Perlakukanlah permintaan hamba
Kalau ada malu akan terhapus
Besar supaya berganti-ganti
Cerdik supaya sekali seorang
Hidupkanlah Kasumbo Hampai”

Jelaslah bahwa peranan ajaran Islam sangat tipis dalam hal ini. Nama Allah dan Rasulullah hanya sebagai pengantar saja bagi doanya atau permintaannya kepada kakeknya yang keramat itu. Dia berdoa dan minta pertolongan bukan kepada Allah. Hal ini memberi gambaran kepada kita bahwa pada masa itu dalam masyarakat masih kuat pengaruh kepercayaan agama Hindu, sedangkan kepercayaan agama Islam masih sangat lemah. Inilah salah satu hal yang dapat kita peroleh dari karya sastra itu. Dengan membaca karya sastra kita akan memperoleh keterangan tentang kepercayaan, pandangan hidup, dan segi-segi sosial dan budaya lainnya.

Di samping itu, salah satu tujuan kita membaca dan meneliti karya sastra ialah untuk menemukan nilai-nilai yang ingin disampaikan oleh pengarangnya. Hal ini akan terlihat nanti dalam pembicaraan kita selanjutnya mengenai fungsi karya sastra itu. Nilai itu akan terlihat dalam tema dan amanat cerita.

1.2 Fungsi Cerita

Cerita seperti ini pertama, berfungsi menyenangkan pembaca yang pada awal cerita diliputi perasaan tegang, sedih dan mengerikan akhirnya menjadi lega dan senang karena peristiwa dalam cerita itu berakhir dengan kebahagiaan semua pihak.

Fungsi kedua yang dapat kita lihat yaitu berupa nasehat. Nasehat yang segera terasa dalam cerita ini ialah agar orang jangan sombong; jangan suka menghina orang miskin atau melarat, orang jelek. Nasehat ini merupakan tema cerita ini. Amanatnya ialah orang yang sombong itu tentu akan mendapat bencana. Hal ini sesuai dengan bunyi peribahasa ”Mulutmu harimaumu yang akan me-

ngerkah kepalamu". Karena mulutnya yang kasar itulah Kasumbo Hampai menderita sampai ia mati bunuh diri. Di dalam pepatah adat Minangkabau pun dinasehatkan agar "*Kok gadang jan malendo, kok cadiak jan manjua*", artinya orang kuat jangan melanda orang kecil, orang cerdik jangan menipu orang bodoh. Tetapi sebaliknya yang harus dipakai yaitu "*Nan cadiak tampaek batanyo, nan kayo tampaek batenggang*" artinya "Orang yang cerdik tempat orang bertanya, orang kaya tempat orang miskin meminjam". Nasehat-nasehat beginilah yang sering kita jumpai dalam sastra lama. Dinasehatkan agar orang jangan takabur, sompong, suka menghina orang yang melarat. Sudah merupakan ciri umum, cerita lama itu biasa digunakan sebagai alat pengajaran.

1.3 Singkatan Isi Cerita

Di Ulak Tanjuang Bungo, Nagari Camin Taruih, Ranah Payuang Sakaki memerintah seorang raja bernama Rajo nan Hangek. Saudara perempuannya bernama Rabiah Rando Kayo bersuami Datuak Bandaharo mempunyai seorang anak perempuan bernama Kasumbo Hampai. Kasumbo Hampai ini seorang putri cantik jelita, tiada taranya, pintar, bangsawan, dan kaya raya. Ketika Kasumbo Hampai ini lahir terlihat keistimewaannya, lantai rumah patah dan fondasi rumah belah menyambut bayi itu. Tingkat kebangsawanannya itu diceritakan sebagai berikut :

Mahalah rajo ka jodohnyo

Mahalah sutan ka tandingnya

Sukar puti lawan duduak

Terjemahannya :

'Sulitlah mencarikan raja untuk jodohnya

Sulitlah mencarikan sultan sebagai tandingannya

Sukarlah mencarikan putri sebagai temannya duduk'

Pesuruhnya dua orang bernama Kambang Manih dan Bujang Salamaek. Ia mempunyai sebuah kolam tempat mandi. Kolam itu hanya untuk raja-raja dan putri-putri raja mandi dan minum-minum.

Tidak jauh dari negeri itu tinggal dua orang bersaudara, seorang laki-laki dan seorang perempuan bernama Mamak Si Hetong dan si Rawan Pinang. Mereka keluarga miskin, rakyat jelata, makan minum pun susah, keluarga mereka tidak ada lagi, silsilah keturunannya tidak jelas.

:Suatu hari Mamak si Hetong menyuruh adiknya si Rawan Pinang pergi ke Ulak Tanjuang Bungo, tempat tinggal Kasumbo Hampai itu. Sampai di negeri itu ia mandi di kolam raja milik Kasumbo Hampai. Sedang ia mandi, Kambang Manih dan Bujang Salamaek datang ke kolam itu. Alangkah kagetnya mereka melihat orang lain berani mandi di situ. Hal itu dilaporkannya kepada Kasumbo Hampai. Kasumbo Hampai segera datang ke kolam itu dan mencaci maki dan menghina sejadi-jadinya si Rawan Pinang itu. Dikatakannya sebagai berikut .

*"Anak anjiang anak binatang
Anak jumbalang moh kironyo
Anak singiang-ngiang rimbo
Anak cancang panarahan
Kononlah bak paras kau iko
Tapijak ka den lantiangkan
Tabuai ka den lapehkan
Tatangguak ka den tuangkan
Bapak kau penjual padi
Mande kau penjual sadah"*

Terjemahannya :

'Anak anjing anak binatang
Anak jumbalang malah kiranya
Anak hantu dalam rimba
Anak cincang penyiangan
Kononlah seperti rupa kau ini
Terpijak akan saya sepakkan
Terbuai akan saya lepaskan
Tertangguk akan saya lemparkan
Bapak kau penjual padi
Ibu kau penjual sadah'

Penghinaan itu diterimanya dengan hati yang sedih dan pedih. Dikatakannya, janganlah berkata sekasar itu karena orang banyak ilmunya, nanti bisa celaka.

Penghinaan Kasumbo Hampai itu diceritakan oleh si Rawan Pinang kepada Mamak si Hetong. Mamak si Hetong bermaksud membala penghinaan itu. Mamak si Hetong menyuruh si Rawan Pinang meminjam rencong sakti kepada Puti Ameh Manah. Ameh Manah meminjamkan rencongnya itu dengan syarat kalau rusak

atau hilang, Mamak si Hetong dan si Rawan Pinang akan dijadikan-nya budaknya.

Setelah mendapat rencong itu, Mamak si Hetong pergi menelusuri hutan, bukit, dan lembah untuk mencari buluh perindu dan kelapa sakti. Akhirnya ditemukannya sebatang pohon kelapa besar, tinggi, dan kokoh. Buah kelapa itu hanya sebuah dan daunnya hanya sehelai. Mamak si Hetong berusaha memanjat pohon kelapa itu sekuat tenaganya tetapi tidak dapat. Berkat bantuan rencong keramat itu Mamak si Hetong diterbangkan rencong itu ke atas sehingga ia dapat memetik buah kelapa itu. Tempurungnya dibawanya pulang. Ia meneruskan pengembaraannya sampai bertemu pula dengan talang perindu di Gunung Bungsu, Simalanggang, Ranah Limo Puluah. Talang perindu itu hanya seruas dan daunnya hanya sehelai. Talang itu diambilnya dan dibuatnya saluang, dan tempurung kelapa tadi dibuatnya untuk rebab.

Selesai membuat saluang dan rebab itu, ia kembali pulang. Mulailah ia dan si Rawan Pinang bersaluang dan berebab merayu Kasumbo Hampai. Rayuan saluang dan rebab itu terdengar oleh Kasumbo Hampai. Kasumbo Hampai mulai tergoda, terpikat mendengar rayuan saluang dan rebab keramat dan sakti itu. Ia tidak bisa makan dan minum lagi karena ingin bertemu dengan Mamak si Hetong. Ia telah jatuh cinta. Rajo nan Hangek marah mengetahui Kasumbo Hampai jatuh cinta kepada Mamak si Hetong orang miskin dan rakyat jelata itu. Namun Kasumbo Hampai sudah ber tekad tidak mau lagi dengan orang lain selain Mamak si Hetong. Bila dilarang juga, ia akan bunuh diri.

Secara sembuni-sembunyi ia ke luar dari rumah pergi ke rumah Mamak si Hetong. Sampai di sana hanya si Rawan Pinang saja yang dijumpainya. Mamak si Hetong dikatakannya sudah pergi ke Lubuak Aluang. Ternyata Mamak si Hetong ada di rumah. Setelah lama Kasumbo Hampai di rumah, bangun Mamak si Hetong dan bermaksud segera pergi. Kasumbo Hampai membujuk Mamak si Hetong supaya tidak pergi berdagang dan Kasumbo Hampai bersedia memberikan hartanya kepada Mamak si Hetong asal Mamak si Hetong mau kawin dengan dia. Mamak si Hetong menolaknya dan segera turun ke halaman dan pergi berjalan. Kasumbo Hampai mengikutinya di belakang sampai di Bukit Sialang dekat ngarai yang dalam. Di dalam ngarai itu ada ular, naga, dan lebah. Di sana Kasumbo terjatuh ke dalam ngarai karena titian-

nya patah. Kasumbo Hampai tinggal dalam ngarai itu sedang Mamak si Hetong meneruskan perjalanannya.

Di dalam ngarai Kasumbo Hampai minta agar ular besar mau menelan dirinya. Ternyata ular tidak mau menelannya karena ular itu tahu bahwa Kasumbo Hampai, tunangan Mamak si Hetong, cucu orang keramat yang berkubur di Bukit Gombak. Ular itu memberi Kasumbo Hampai cincin dan benda keramat. Demikian pula halnya dengan ular tedung dan lebah tidak berani mengganggu.

Dengan menggunakan cincin bertuah pemberian ular besar itu Kasumbo Hampai memanggil borak. Borak itu disuruhnya memberi tahu orang tuanya dan mamaknya Rajo nan Hangek bahwa Kasumbo Hampai berada di dalam ngarai. Mulanya Rajo nan Hangek tidak percaya berita itu. Setelah diperlihatkan oleh borak rambut dan cincin Kasumbo Hampai, barulah Rajo nan Hangek yakin bahwa berita itu benar. Diperintahkan oleh Rajo nan Hangek rakyat pergi menjemput Kasumbo Hampai. Rajo nan Hangek berangkat dengan kuda terbang. Sampai di sana, Kasumbo Hampai dikeluarkan dengan rotan. Semua orang terharu melihat peristiwa itu. Pada waktu itu Kasumbo Hampai berpesan agar ia dikuburkan di Bukit Sialang bila nanti ia mati.

Setelah beberapa lama Kasumba Hampai tinggal di rumahnya, timbul pikirannya hendak bunuh diri. Dengan bermacam cara semua orang disuruhnya pergi dari rumah itu sehingga ia tinggal sendiri. Pada waktu itulah ia bunuh diri dengan rencong sakti. Ia bunuh diri itu karena malu, keinginannya hendak kawin dengan Mamak si Hetong tidak terkabul. Perasaan malunya itu dilukiskan sebagai berikut.

*"Malu den indak tatahan
Mamak rajo janyo urang
Ibu kayo janyo-urang
Bapak batuah di nagari
Awak rang gadih janyo urang
Kahandak tidak kan balaku
Pado hiduik eloklah mati
Isuak mati kini mati"*

Terjemahannya :

'Malu hamba tidak tertahan
Mamak raja kata orang

Ibu kaya kata orang
Bapak bertuah di negeri
Awak gadis kata orang
Keinginan tidak akan terkabul
Daripada hidup baiklah mati
Besok mati kini mati'

Sekembalinya ibu bapaknya di rumah, didapatinya rumah terkunci. Setelah pintu dibuka, kelihatannya Kasumbo Hampai sudah mati bunuh diri dengan rencong sakti.

Semua orang disuruh datang menyaksikan peristiwa sedih itu. Sesuai dengan amanatnya Kasumbo Hampai dikuburkan di Bukit Sialang. Hadir orang dari tiga luak, yaitu Luak Tanah Datar, Luak Limo Puluah, dan Luak Agam. Semua orang diberi sedekah. Sesudah itu diadakan selamatan selama tiga hari.

Mamak si Hetong kembali dari berdagang setelah ia kaya. Di Bukit Sialang itu ia bertemu dengan sebuah kuburan. Atas pertanyaannya kepada pengembala di sana, dijelaskan pengembala itu bahwa kuburan itu adalah kuburan Kasumbo Hampai. Segera digalinya kuburan itu. Kemudian ia berdoa kepada Allah dan Rasulullah dan kepada kakeknya yang keramat itu yang berkubur di Bukit Gombak agar Kasumbo Hampai dihidupkan kembali. Berkat keramat kakeknya itu, Kasumbo Hampai hidup kembali. Mereka berdua terus pulang ke rumah Mamak si Hetong. Selanjutnya, si Rawan Pinang minta kepada kakek keramatnya agar diberi sebuah rumah lengkap dengan alat-alatnya serta kerbau, sapi, dan lain-lain untuk persiapan pesta perkawinan Mamak si Hetong dengan Kasumbo Hampai. Atas nasehat Mamak si Hetong, Kasumbo Hampai memanggil orang tuanya dan mamaknya Rajo nan Hangek untuk menghadiri pesta perkawinannya dengan perantaraan borak. Orang tua dan Rajo Hangek kaget mendengar berita bahwa Kasumbo Hampai sudah hidup kembali dan akan kawin dengan Mamak si Hetong.

Rajo nan Hangek dan orang tua Kasumbo Hampai diiringi rakyat pergi menghadiri pesta perkawinan itu. Kasumbo Hampai dan Mamak si Hetong tetap tinggal di rumah Mamak si Hetong dan tidak mau dibawa oleh orang tuanya dan Rajo nan Hangek kembali ke rumahnya. Tidak lama antaranya lahirlah anaknya seorang laki-laki, diberinya nama Sidawan Pakan. Setelah anak itu menginjak dewasa, ia selalu menanyakan rumah ibunya. Ibunya Kasumbo

Hampai tidak mau mengatakannya karena masih dendam terhadap Rajo nan Hangek. Ia berusaha sendiri mencari kampung halaman ibunya. Ibunya memberinya cincin keramat pemberian ular dulu itu dan baju terbang. Atas bantuan cincin keramat itu ia dapat bertemu dengan neneknya yang sudah mati. Neneknya itulah yang menceritakan kekejaman Rajo nan Hangek terhadap ibunya, melarang ibunya kawin dengan Mamak si Hetong. Atas petunjuk nenek itu ia pergi ke negeri Rajo nan Hangek untuk membunuh raja yang zalim itu. Setelah bertemu terjadilah perkelahian Sidawan Pakan dengan Rajo nan Hangek. Akhirnya Rajo nan Hangek mati dibunuh Sidawan Pakan. Setelah Rajo nan Hangek tewas, barulah ia kembali pulang memberi tahu orang tuanya. Mamak si Hetong diangkat jadi raja menggantikan Rajo nan Hangek.

Mamak si Hetong ingat jasa baik Puti Ameh Manah yang dulu meminjaminya rencong Aceh. Atas nasehat Hakim Perdana, si Rawan Pinang adik Mamak si Hetong, dikawinkan dengan Sutan Lembang Alam anak Puti Ameh Manah itu sebagai balas jasa terhadap Puti Ameh Manah. Kedua belah pihak sederajat dan bangsawan tinggi. Kedua belah pihak setuju sehingga bertambah eratlah hubungan mereka itu.

Diadakanlah pesta perkawinan itu secara besar-besaran.

Mamak si Hetong dengan rakyatnya datang ke rumah Puti Ameh Manah menjemput Sutan Lembang Alam dengan upacara kebesaran menggunakan garuda. Mamak si Hetong gembira mengawinkan adiknya itu dengan anak Puti Ameh Manah yang berjasa kepada-nya itu. Kebahagiaan sebagai akhir cerita ini dilukiskan sebagai berikut.

"Kononlah Mamak si Hetong

Jo Kasumbo Hampai

Sangaeklah suko dalam hati

Karano hutang lah babaya

Lah basanang-sanang diri sajo"

Mamarentah dalam nagari

Salamo Mamak si Hetong

Jadi rajo

Urang mamuji samuonyo

Pangasiah panyayang ka rakyat

Barakaek Allah batolong padonyo

Anak buah sanang taranak manjadi."

Terjemahannya:

'Adapun Mamak si Hetong
Dengan Kasumbo Hampai
Amat senang dalam hati
Karena hutang sudah dibayar
Sudah bersenang-senang diri saja
Memerentah dalam negeri
Selama Mamak si Hetong
Jadi raja
Orang memuji semuanya
Pengasih penyayang kepada rakyat
Berkat Allah menolong kepadanya
Anak buah senang peternakan berkembang.'

II. ALIH AKSARA

Tatkalo mulo-mulonyo
Alun basuri Kurai Taji
Alun batiku Pariaman
Alun basintuang Lubuak Aluang
Bumi ka tahan tam turun
Langik ka tasintak naiak
Lauik salaweh daun marunggi
Dunia salaweh tapak kudo
Buruang batolan-tolanan
Dagang Babondong-bondongan

Ado saparkaro
Duo dalam Ulak Tanjuang Bungo
Di nagari Camin Taruih
Di itiak muaro itan
Di ranah Payuang Sakaki
Di anak nan kaciak-kaciak
Di Lagundi nan linggayuran
Di karambia atua tungku
Di pinang nan lamah-lamah
Di cubadak gadang tinggi
Di lakat kanji satampuak
Kok tinggi duo jo randah
Kok hino duo jo mulia
Kok elok duo jo buruak
Kok kayo duo jo sukar

Sialah urang nan kayo
Iyolah Datuak Bandaharo
Iyo Rubiah Rando Kayo
Dunsanak Rajo nan Hangek
Dek uantuang jo paruntuangan

Dek laruik lamo babhua
Tumbuah baranak babuah
Ado anaknyo padusi
Tibo lantai lantai patah
Tibo sandi sandi balah
Baharu ado baharu banamo
Banamo Kasumbo Hampai
Kok kicik pancakau lalat
Kok ketek akanyo panjang
Ruweh bak anak kambiang
Bak lobak di pamarunan
Bak jaguang tangah duo bulan
Maruai bak padi masak
Tak gadih saelok itu
Maha sutan ka tandiangnyo
Maha rajo ka jodohnyo
Bak malaikat turun ka dunia
Nabi ka jawek salam
Kok diagak diagiahkan
Kok dicurai dipapakan
Mukonyo bagai bulan panuah
Hiduangnyo bak talua bonda
Pipinyo pauah dilayang
Kaniangnyo kiliran taji
Abuaknyo lindir disintak
Di kaniangnyo bantuak tajian
Di tundan kaja mangaja
Sangguanyo bajuntai halai
Pangarang duo puluah ampek
Panggantuang sambilan halai
Siganyo manjalan mancik
Hinggok langau // tunggang langgang
Bak antun linggih sangguanyo
Nan gadih Kasumbo Hampai
Anak Rabiah Rando Kayo
Kamanakan Rajo nan Hangek
Caliaknyo camin talayang
Karipih palito padam
Kilap pagigi ambun

Bibianyo limau sauleh
Gigi kalimbojo masak
Daguaknyo awan tagantuang
Batang lihia mundam dilarik
Siriang guntiang bak manyangek
Rampik pilin bak pianggang
Pinggang sacakak daun budi
Batih bak paruik padi
Lutuik mambuka banta
Induak tangan bungka satahia
Jari sigulandak gunci
Papek kuku bulan tigo hari
Bak itu tando rancaknyo

Kok diagak diagiahkan
Kayonyo Kasumbo Hampai
Kabau bantiang tayok di padang
Kambiang panuah di baluka
Itiak tanang di muaro
Parapati linduang di bulan
Randangan sakarat koto
Sawah gadang babuah banda
Kapa kicik salek samalek
Di tangah si bayau-bayau
Di rumah si Tinjau Lauik
Di tapi si tangguang lapa
Makanan dagang nan lalu
Minuman urang kampuangnyo
Sabuah hanyo pantangnyo
Asa jan dibuang-buang
Bak itu tando kayonyo
Nan gadih Kasumbo Hampai

Kaba baraliah hanyo lai
Sungguah baraliah sanan juo
Takaba suka jo bangsaek
Sialah urang nan suka
Io mah Mamak si Hetong
Baharato babando tido
Bamamak baniniak tidak

Makan minunnyo lai tido
Gulai satanggi panghidupan
Aia sagaluak nan dimakan
Habih tahun baganti tahun
Habih bulan baganti bulan
Awak kuruih daki lah banyak
Tulang rusuak balunjuran
Daki di pungguang lah baguluang
Bakain sacudik ketek
Kiro panyahok orat sajo
Baitu tando bansaeknyo
Baitu tando suka nyo
Nak urang Mamak si Hetong
Tingga baduo baradiak
Si Rawan Pinang namo adiaknyo

Manangih si Rawan Pinang
Apolah buah tangihnyo
"Tuan hai Mamak si Hetong
Nyato paruik litak nak makan
Nyato awak hauih nak minun
Bak ka titiak darah di tunjuak
Bak ka hilang nyao
Bak ka putuih rangkai hati
Bak ka rompong ubun-ubun
Bak nantun litak paruik den
Tuan hai Mamak si Hetong."
Katonyo si Rawan Pinang
Manjawab Mamak si Hetong,
"Adiak kanduang si Rawan Pinang
Tak elok Adiak parusuah
Tak elok Adiak parisau
Urang parisau dareh mati
Urang parusuah dareh tuo
Lai amuah Adiak den suruah
Kok iyo paruik litak nak makan
Kok iyo hauih nak minun
Pailah Adiak ka kiun
Ka kampuang Kasumbo Hampai

Ka luak ka Padang Rayo
Lumut lintah tiado
Sipat sajo nan marupo
Kulari babondong hilia
Ikan gadang babondong mudiak
Anak pantau bamain-main
Baolah aia sagaluak
Baolah gulai satangkai
Kapik kayu sakarek
Gulai ka ubek litak
Aia ka ubek hauih.”

Mandanga kato damikian
Bajalan si Rawan Pinang
Bajalan baguluik-guluik
Bajalan Bagageh-gageh
Paluah lahuntuak intaian
Hangok lah gadang ketek
Lah dakek kampuang ka sampai
Aluran tibo di sinan

Lah tibo si Rawan Pinang
Di sumua Kasumbo Hampai
Bapantun si Rawan Pinang
Apolah buah pantunnyo

Kampia kaciak kampia basuji
Kampia disudah dipamulia
Aia janiah tapian suci
Di sumua Kasumbo Hampai
Kok hanyo mandi den siko
Paruik den litak ka kanyang
Awak den hauih ka sajuak
Tubuah nan buruak ka elok
Lalu mandi sakali
Sabanta Si Rawan mandi
Duo banta si Rawan mandi
Lah karuah pincuran urang
Dek daki si Rawan Pinang

Di maso dewaso itu
Hari nan sadang tangah hari
Sadang bunta bayang-bayang
Sadang litak-litak anjiang
Sadang kanyang-kanyang pipik
Tasintak Kasumbo Hampai
Lalu jago sakali
Bakabek-kabek jo aka
Bajuru-juru jo cindai
Bapalun jo rambuik
Bakato Kasumbo Hampai
"Diak kanduang si Kambang Manih
Dangakan pantun den dikau
Limo kupang limo busuah
Duo kali tangah tigo
Ameh kirang duo kupang
Sapah hari kok mamang
Barisuak balimau ka sungai
Paneh ka paham buang-hambuang mara."
Mandanga kato nan bak kian
Jadilah heran kiro-kiro bapanyo
Mabuak hati bundo kanduang
Maagaki huruf pantunnyo
Mamikia takbirnyo
Kuatlah si Kambang Manih
Iolah orang nan bijak
Kambang Manih kambang denai
Hinggok di rantiang mambunuah
Si Kambang nan bakeh hati
Awaknyo rajin disuruah
Capek kaki ringan tangan
Karajo taulah-taulak
Mamacah sakali balun

Birawari si Kambang
Mancabua ka biliak dalam
Malantak peti manggewang
Mandayuang tali bubutan
Tabuka buntia nan gadang

Barisi pakaian sasalin
Apolah roman pakaian
Hitam batapi tak tantu
Kalabu biru tak habih
Kapeh Kuantan Batang Hari
Dijujuk badalua-dalua
Dipageh badambun-dam bun
Ditanun nak rang baisang
Digantiah nak rang baparuh
Kalari si bungo alai
Baminggok bamingga-mingga
Baraua-aaa manyasap
Bapucuak rabuang tapinyo
Tiok sasuduik tiok piganta
Tiok tapi tiok pilalang
Pakaian Kasumbo Hampai

Birawari Kasumbo Hampai
Babaju sambia ka dapua
Baminyak samiang ka biliak
Bacamin sarang ka pintu
Mamakai ka tangah rumah
Rantak marantak susun kain
Hirai gumirai gunci cawek
Irun gumirun tanti baju
Batapuak subang di pipi
Baralun galang di tangan
Manyisik cincin di jari
Jari sigulandak gunji
Langan antaran hanyuik
Batih bak paruik padi
Lutuik mambuku banta
Induak tangan bungka sapaho
Induak kaki barek satahia
Papek kuku bulan tigo hari
Kok dek lorong ka romannyo
Nan gadih Kasumbo Hampai
Mahalah rajo ka jodohnyo
Maha sutan ka tandiangnyo

Sukar puti lawan duduak
Pihak kapado sanguanyo
Sanguanyo bajumbai alai
Panggantuang duo puluah ampek
Pangarang sambilan alai
Siganyo manjalan mancik
Hingok langau tunggang langgang
Dek linggih sangguu nan gadih

Kununlah di Kasumbo Hampai
Dijali rokok sabatang
Dikunyah siriah sakapua
Sadang elok pamulutan
Sadang dapek agak-agak
Sanan bakatolah awaknyo
"Diak kanduang si Kambang Manih
Baolah limau sabuah
Bao kumanyan kambang hai
Diak kanduang si Salamaek
Bujang baolah api di sabuik
Dahulu kalian ka pincuran
Papeklah limau di ang samantaro
Pasanglah niaeck jo kaua
Bacolah, "Ya Allah ya Sayyidi
Ya Maula ya Tuhanku
Junjungan den bajalan salamaek
Diganggam rencong jo suok
Dipacikkan mangkuak jo kida
Bajalan baduo jo Si Kambang
Lah dakek hampiang ka tibo
Nak rang si Kambang Manih
Sinan bakatolah awaknyo.
"Tuan hai si Salamaek
Caliak di Tuan tantu-tantu
Pandang di Tuan nyato-nyato
Kok mato den nan bapusuk-pusuk
Kok pancaliakan den nan batuka-tuka
Puti di mano tu nan mandi?"

Manjawab si Salamaek,
"Diak kanduang si Kambang Manih
Siko kito mulo susah
Siko kito mako kiamat
Ukan dek puti nan mandi
Si Rawan Pinang kok mah itu
Adiak Mamak si Hetong."

Birawari si Kambang Manih
Dicampakkannya olah rencong
Dilantiakkannya kumayan
Diserakkannya tu limau
Babaliak suruik si Kambang
Paluahlah untuak untaian
Hangoklah gadang-gadang ketek
Dek sangaek latiah bajalan
Lah tibo si Kambang Manih
Di bawah unduang nan gadang
Lah batamu jo nan gadih
Bakato Kasumbo Hampai,
"Darah den badabua-dabua
Jo sia Adiak batingkah
Jo sia Adiak bakalahi
Mulo sarupo satampnan iko?"
"O Aciak Kasumbo Hampai."
Katonyo si Kambang Manih,
"Ukan kami bakalahi
Ukan hambo batingkah
Langik runtuah tanah lah taban
Si Rawan Pinang namonyo tu Adiak
Adiak Mamak si Hetong
Mandi di pincuran kito
Lah karuah pincuran kito
Lah panuah di dakinyo."

Lalu berang Kasumbo Hampai
Dicabiak baju di dado
Dibungkuuh kain dalam badan
Barakaek bangih hatinyo

Lapeh pangarang sanggua
Tagerai rambuik nan gadih
Baliuak-liuak di tanah
Bakabek-kabek di tumik
Bapalun-palun di pinggang
Tibo awaknyo di pincuran
Nan gadih Kasumbo Hampai
Bakatolah awaknyo,
"Sia iko paja nan mandi
Nan mandi di sumua hambo
Sumua hambo sumua batuah
Bakeh rajo mandi-mandi
Bakeh sutan minun-minun
Di sia kau dapek pangaja
Di sia kau buliah pitua
Anak anjiang anak binatang
Anak jumbalang moh kironyo
Anak singiang-ngiang rimbo
Anak cancang panarahan
Kononlah bak paras kau iko
Tapijak ka den jingkiangkan
Tabuai ka den lapehkan
Tatangguak ka den tuangkan
Bapak kau panjua padi
Mande kau panjua sadah
Cacek kau batukuak-tukuak
Hino kau batambah-tambah
Bana bak pantun urang
 Balari-lari ka pakan
 Mandapek alang ateh punggua
 Lah ganok hari kau tiado makan
 Jago maik dalam kubua".
Mandanga kato nan bak kian
Bakato si Rawan Pinang,
"Kak hai Kasumbo Hampai
Jan Kakak baitu bana
Lauik sati rantau batuah
Urang dunia pandai-pandaian
Kok tak dapek di urang siko

Ka danau hambo mintakan
Ka Aceh batandang tidua
Nan gadih ka sanang tido

Birawari si Rawan Pinang
Nyo kapik gulai satanggi
Nyo pangku kayu sakarek
Nyo jinjiang aia sagaluak
Dilakekkannya kodeknyo
Kodeknyo sacapiang ketek
Kiro panyahok orat sajo
Baitu tando mikinnyo

Babaliak si Rawan Pinang
Satu tibo inyo di dangau
Bakato si Rawan Pinang,
"Tuan hai Mamak si Hetong
Anto hijuak dihelokan
Baa hanyo saga nan tabao
Parakek di pinggang tabiang
Sajak samulo den katokan
Disasa ka dapek tido
Jariah den tabuang samiang
Tuan suruah juo den kiun
Sumua urang sumua batuah
Bakeh rajo mandi-mandi
Bakeh sutan minun-minun
Bakeh gadih bamain-main
Bakeh puti bahiruak-hiruak
Dek tumbuah malang jo maleh
Sataro awak den mandi
Batamu jo Kasumbo Hampai
Lah buliah amun jo cacek
Lah buliah upek jo puji
Joalah malu ka dibangkik
Baharato babando tido."

Birawari Mamak si Hetong,

”Jan itu Adiak rusuahkan
Jan itu Adiak risaukan
Lai amuah Adiak den suruah
Ka rumah Aciak Ameh Manah
Pailah manyalang rencong
Dititiak tukang duo baleh
Disapuah tukang batujuah
Disintak bakato-kato
Diganggam batutua-tutua
Ratok puntiang tando gateh
Tabang ka pugua tibo di pungguah
Angok angak maik di kubua
Biso nan tidak katawaran
Itulah rencong nan ka kau salang
Ka rumah Aciak Ameh Manah
Anak Tuanku Adu Dalah

Kononlah si Rawan Pinang
Baharu Tuannya manyuruah
Awaknya bajalan sakali
Ka Rumah Aciak Ameh Manah
Lah dakek hampia ka sampai
Mandariang silindik jantan
Mambilobok baruak nan tunggal
Manyalak anjiang nan gagok
Bakokok kinantan cucai
Mambaleh sibiriang kuniang
Hiruak-hiruak ayam nan banyak
”Sutan nan mano nan ka tibo
Rajo nan mano nan ka datang
Puti langik mano nan ka turun
Adiak kanduang si Kambang Manih.”
Kato Aciak Ameh Manah
Mancabua ka biliak dalam
Lantak jo peti manggoyang
Mandanguang tali bubutan

Saribu pasak malonjak
Tabuka peti nan gadang
Barisi pakaian rumah
Takambang tirai jo kulambu
Takambang tirai langik-langik
Baserak kasua tangah rumah
Lah lakek pakaian rumah
Kok dihetong rumah Ameh Manah
Dampar-dampar siula gariang
Tuturan labah mangirap
Gonjong atok rabuang mambacuik
Halaman carano basah
Manjanguak Puti Ameh Manah
Mancaliak lalu ka halaman
Sinan tacanganglah awaknyo
Kironya ukan puti nan datang
Ukan to gadih nan lah tibo
Kironyo si Rawan Pinang
Adiak Mamak si Hetong
Bapantun si Ameh Manah
 Cubadak tangah halaman
 Tataruang di hampu kaki
 Si Rawan usah tagak di halaman
 Tu kendi basuahlah kaki
Manjawab si Rawan Pinang,
"Kak hai Aciak Ameh Manah
Den atok den atun-atun
Den lalu ka kida rumah
Mulo den tagak tatagun-tagun
Haram den aso Aciak di rumah."
Lah naiak si Rawan Pinang
Ka rumah Aciak Ameh Manah
Lah timbang salo-manyalo
Lah ganti siriah manyiriah
Rokok lah habih sabatang
Siriah lah habih sakapua
Sarilamak jatuah ka paruik
Sari murak tingga di muko
Sirah tingga di bibianyo

Sadang elok pamulutan
Aciak Puti Ameh Manah
Jo si Rawan Pinang.

Bakato si Rawan Pinang,
"Mulo den datang ka mari
Malang tak buliah den tulak
Mujuah tak buliah den raiah
Pai den ka sumua Kasumbo Hampai
Lah diupek dipujinyo
Lah diamun dicaceknyo
Joalah malu ka den bangkik
Baharato babando tido
Baniniak bamamak tidak
Ambek lai harato jo bando
Minun makan lai den tidak
Aia sagaluak nan den minun
Gulai satangkai nan den makan
Kok lai hibo Kakak di den
Kok lai kasiah di nan bansaek
Salangilah den rencong Kakak
Nan dititit tukang duo baleh
Nan disapuah tukang batujuah
Malompeh nan pandai bana
Kok lai buliah den manyalang
Kok lai ka tabangkik malu gadang
Nak baganti-ganti cadiak
Nak sakali surang."
Manjawab Ameh Manah,
"Adiak den si Rawan Pinang
Asa jan rencong kau salang
Ameh perak baolah di kau
Kabau bantiang baolah di kau
Mako den tak amuah bapasalang
Rencong den rencong pusako
Dititik nenek moyang den
Rencong sudah tukang babunuah
Kok patah jo a kau titik
Kok sumbiang jo a kau kimpa

Kok hilang jo a kau ganti
Itu mako den tak amuah
Bapasalang rencong den ka kau.”

Manangih si Rawan Pinang
Uwainyo sauwai-uwai
Isaknyo saisak-isak
Inguihnyo sainguih-inguih
Paluah sapukan jo suok
Aia mato sapu jo kida
Kok nan hilang rencong Kakak
Buliah hambo ganti
Kok patah buliah hambo kimpa
A nan ka pangimpa
Kami baduo baradiak
Surang jantan surang padusi
Mamak si Hetong tuan den
Si Rawan Pinang awak den
Ambiak budaklah di Kakak
Kok hilang itu ka pangganti.”

Bakato Tuanku Dadu Alah,
”Anak kanduang si Ameh Manah
Agiahkan juo rencong kainyo
Kok hilang awak den malah mangganti.”
Kato Tuanku Adu Dalah
Dek hibo ka si Manah
Disuruaah agiahkannya

Rencong bakeh si Rawan
Lah tibo si Rawan Pinang
Di rumah Mamak si Hetong
Baharu tibo inyo di rumah
Balari Mamak si Hetong,
”Adiak kanduang si Rawan Pinang
Lai buliah nan kau salang
Ka rumah si Ameh Manah.”
Manjawab si Rawan Pinang,
”Insya Allah lai Tuan

Tatapi bataakik kito saketek
Koknyo hilang rencong urang
Kito diambiaknyo budak
Kok jamua urang kito tumbuak
Kok anak urang kito asuah
Kok sawah urang kito pangkua
Itu nan ka pamali rencong urang
Karano ameh tiado di kito
Sawah ladang jauah sakali
Minun makan kito li tido
Batahun-tahun kito tak makan
Bamusim-musim kito tak minun
Gulai satangkai panghidupan
Barakaek sukar miskin kito.”

Mandanga kato nan bak kian
Manjawab Mamak si Hetong,
”Kok itu Adiak jan rusuah
Tinggalah Adiak di rumah
Nak den bajalan jauah.”

Bakato si Rawan Pinang
Bakato sambia manangih,
”Kok itu Tuan katokan
Iyo lah hibo bana hati den
Sabab awak den ketek baru
Sabab ikolah ruponyo rumah
Kok dinding samugaian
Kok atok bintang-bintangan
Kok janjang sayuik-sayuik sampai
Kok tumbuah malang jo maleh
Samantaro Tuan bajalan
Kok datang ka jahatannya
Kok tibo ula nan gadang
Adiak Tuan kok diluluanyo
Sialah koh nan ka den pakiak
Sialah nan ka den rahik

Indak bakaum kaluarga
Kok pulang Tuan bajalan
Di sia den ka Tuan tanyakan
Ikolah ruponyo kampuang.”

Bakato Mamak si Hetong,
”Kok itu nan kau katokan
Diak kanduang si Rawan Pinang
Pacikkan pitaruah den di kau
Tutuik pintu arek-arek
Jambolah lapiak daun pua
Kambangkan di tangah rumah
Lalok sajo paningga den
Itu nan ka pitaruah den
Nan usah kau ubah-ubah.”
Manjawab si Rawan Pinang,
”Kok itu Tuan katokan
Iyolah rusuah hati den
Mako den bahati rusuah
Tuan ka pai bajalan
Hambo ka tingga di dangau
Tingga di dangau lai buliah lalok
Nan pai baalah garan
Sabab bapitih sapitih tidak
Babareh ciek lah baa
Bakain baa sacabiak
Antah tagolek dalam rimbo
Antah tagolek ka balukar.”
Manjawab Mamak si Hetong,
”Usah kau lapeh jo bareh
Usah kau lapeh jo pitih
Lapeh jo hati nan suci
Lapeh jo muluik nan manik.”

Bajalan Mamak si Hetong
Dangau ditutuikkannyo sakali
Si Rawan lalok sakali
Karuah bak bunyi manau

Angok lah gadang-gadang ketek
Lah sapakan Mak Hetong pai
Banyaklah rimbo tarimboi
Banyaklah baluka tatajuni
Banyaklah bukik nan tadaki
Minun tidak makan tidak
Lah habih pakan sapakan
Tibo di tangah padang laweh
Agin tiado ribuik tiado
Paneh pun tiado pulo
Nampak dinyo karambia sabatang sajo
Ureknyo sampai ka pitalo
Pucuaknyo lanteh ka ateh langik
Sabulan tupai mamanjek
Duo bulan tupai nak turun
Satahun indayang nak jatuah
Baralah katinggi karambia
Lalu dipanjeknyo di Mak Hetong
Satingkek inyo maningkek
Duo tigo rueh talampau
Lah tibo di tangah-tangah
Baranti sanan Mak Hetong
Tarang tantu sakaliliang
Tampak lauik samuhonyo
Ditingkek satingkek lai
Lah tibo si Daulai dulai
Mambubuik cakua tangah padang
Mambukek kayu dalam rimbo
Kok patah karambia nantun
Tulang dapek jadi huba

Kononlah maso lai nantun
Lah hilang aka Mak Hetong
Lah putuih pangharapannyo

Badan lah mandi jo paluah
Hangok lah gadang-gadang ketek
Dek uantuang jo paruntuangan
Dek uantuang pambari Allah

Allah manolong padonyo
Bakato rencong si Ameh Manah,
"Tuan hai Mamak si Hetong
Karambia usah Tuan panjek
Pacikkan saruang den di Tuan
Nak tarabang ka ateh karambia
Karambia babuah sabuah sajo
Badaun sahalai sajo."

Lalu dipaguiknyo dahan cako
Di rencong si Ameh Manah
Lah jatuah karambia turun
Lah tibo Mak si Hetong di bawah
Lalu dikubaknyo karambia nantun
Dirauiknyolah tampuruangnyo
Mulo bajalan Mak Hetong
Ka mano Mak Hetong bajalan
Ka ranah ka Limo Puluah
Ka tasa ka Simalanggang
Lah ka bawah gunuang bungsu
Di ateh baringin sati
Di tangah talang parindu
Barueh sarueh sajo
Badaun sahalai sajo
Itu talang diambiaknyo
Dibuek ka saluang cita
Tampuruang dirauik ka rabab
Saluang sudah rabab pun sudah

Babaliak Mamak si Hetong pulang
Lah tibo inyo di rumah
Lah jago si Rawan Pinang
Bakato si Rawan Pinang,
Kok litak Tuan tu kini
Kok hauih Tuan agaknyo
Mangelailah Tuan samantaro
Nak den hangekkan aia sacacah."
Lah tidua Mamak si Hetong
Lah pai si Rawan ka dapua
Dibaonyo gulai sitanggi

Ditanaknyo aia sagaluak
Gulai masak aia pun hangek
Lah dibaonyo di si Rawan
Ka bakeh Mak Hetong tidua
Lah jago Mak Hetong tidua
Lah makan baduo baradiak
Mak Hetong maminun aia
Si Rawan mamakan gulai
Aso siang hari barisuak
Harinyo Jumaek

Hari manjalang tangah hari
Bakato Mamak si Hetong,
"Barabab kito Rawan hai
Basaluang kito sabanta
Saluang ka ubek litak
Rabab ka ubek hauih
Tinggi randah bunyinyo saluang
Gagok tigo bunyinyo rabab
Pipik tabang jadilah hinggok
Aia mahilia jadi baranti
Mandanga rabab si Rawan
Mandanga saluang Mak Hetong
Bapantun Mamak si Hetong
Apolah buah pantunnyo

Ka ditabang batang jualaian
Diubek ka kida parumahan
Badarun panabangannyo
Inja kito kito tiyupkan
Bulan tu kito bilangkan
Musim barado katartahan dinyo

Kaba baraliah tantang nantun
Sungguah bariliah sanan juo
Baraliah bakeh nan gadih
Bakato Kasumbo Hampai,
"Apak Datuak Bandaharo
Biai Rubiah Rando Kayo
Mamak Datuak Rajo Angek
Den mandanga saluang urang

Aia den minun sambiluan
Nasi den makan raso sakam
Tidua nan tidak talalokkan
Duduak nan tidak tasanganan
Mandanga rabab si Rawan
Mandanga saluang Mak Hetong.”
Bakato Rajo nan Angek
Kamanakan Kasumbo Hampai,
”Kononlah Mamak si Hetong
Makonyo pandai basaluang
Saluangnyo ka ubek litak
Kononlah si Rawan Pinang
Makonya pandai basaluang rabab
Rababnyo ka ubek hauih
Sabab minun tiado makan tiado
Gulai satangkai panghidupan
Aia sagaluak nan diminun
Ka a dikau Mak si Hetong nantun
Nak den tanaklah galanggang
Bago sahari urang rami
Bago sabingkah tanah sajo
Ka langik buruang den lapeh
Ka darek kalansing pai
Ka lauik biduak baranang
Sutan di mano di hati kau
Rajo nan mano ka dijapuik
Asa jan Mak Si Hetong.”

Manjawab Kasumbo Hampai,
”Kok Mamak bunuah den ka mati
Mamak jua den ka jauah
Mamak gantuang den ka tinggi

Bago sutan Mamak jangko
Bago rajo Mamak bao
Asa indak Mamak si Hetong
Tak dapek tu Mamak hetong
Banang situka lawan lihia
Tabiang tinggi hamburan den

Rencong Aceh lawan dado
Nak pueh hati mandeh kanduang
Datang nan elok buruak juo.”

Di hari sahari nantun
Hari tagolek tangah hari
Sadang kanyang-kanyang pipit
Sadang litak-litak tulang
Sadang bunta bayang-bayang
Birauari Kasumbo Hampai
Biai Rubiah ronda kayo
Bapak Datuak Bandaharo
Kok bapantun den sabuah
 Den hindang tidak tahindang
 Den tampi batambah luluah
 Den kirai badadak juo
 Den rintang tidak tarintang
 Den pujuak batambah rusuah
 Mak Hetong taragak juo
Painyo ka biliak dalam
Malantak peti manggayuang
Babunyi puputan kilang
Tabuka peti nan gadang
Diambiaknyo urai satahia
Dibaonyo ringgik saratuuh
Ka baka inyo bajalan
Manuruik akeh Mak Hetong
Ringgik disimpan ka puro
Urai disimpan ka pinggang
Bajalan ka tangah rumah
Bakato Kasumbo Hampai,
 ”Mamak den Rajo nan Hangek
 Mamak patah iyo tapatah
 Dirangkuah baduo-duo
 Mamak tagah iyo tatagah
 Mandacua den pai juo
Ka rumah si Rawan Pinang
Ka akeh Tuan Mak Hetong
Tagaknyo ka pintu gadang

**Mahadok lalu ka halaman
Sanan bapantunlah awaknyo**

Tinggi malonjak lah kau batuang
Tidak den tabang lai
Tingga mancanguiklah kau kampuang
Indak ka den ulang-ulang lai

Elok nak tabuang samiang
Gadih nak sansai sajo
Nak pueh hati mandeh kanduang
Bajalan turun nan gadih
Talenggang rumah gadang
Tagendeng anjuang nan tinggi
Manangih Kasumbo Hampai
Kabau bantiang tinggalah tingga
Urang dangau tinggalah angkau
Sawah ladang tinggalah angkau
Hambo bajalan hanyo lai

Hari sadang tangah hari
Bajalan Kasumbo Hampai
Salenggang duo layuaknyo
Tapijak samuik haram mati
Tataruang halu patah tigo
Ka suok siganjua lalai
Ka kida siganjua luluah
Ka suok tampan manganai
Ka kida tampan marusuah

Alah sarantang pajalanan
Alah duo rantang bajalan
Lah dakek hampia ka sampai
Ka dangau si Rawan Pinang
Tibo awaknyo di sinan
Bakato si Rawan Pinang,
"Kak hai Kasumbo Hampai
Mangalah Kakak ka mari
Nan tak tahu di kayo awak
Tak tahu di elok awak

Awak hambo urang misikin
Bansaek nan ukān ulah-ulah
Minun makan hambo lai tido
Habih tahun baganti tahun
Habih musim baganti musim
Gulai satangkai panghidupan
Aia sagaluak nan dimakan
Mangalah Kakak ka mari
Cacek Kakak batukuak-tukuak
Hino kok batambah-tambah
Sabab bapak den panjua padi
Mandeh den panjua sadah
Cacek kok datang kudian
Dangakan banalah di Kakak
 Den tutuah rantiang maransi
 Den Ambiak pagā samayan
 Lah jauah Mamak Hetong kini
 Lah ka Tiku Pariaman
Lah ka Sintuang Lubuak Aluang
Lah ka Solok ka Siloyo
Lah ka Kubuang Tigo Baleh
Ka Kualo Banda Mua
Ka piso-piso hanyuik
Lah ka Sirangkak nan Badangkuang
Sajak Kakak amun cacek
Talalu larek sakali
Kakak den Kasumbo Hampai
Kok baitu bana janyo den
Insya Allah sananglah hati den
Kakak kok ka naiak dangau
Gutialah daun dahulu
Ka pahaleh kain Kakak
Sabab lantai bahabu-habu
Palupuah basarok-sarok
Ikolah ruponyo pakaian
Jan gadang Kakak marugi.”

Lah naiak Kasumbo Hampai
Ka rumah si Rawan Pinang

Lah bangun Mak Hetong tidua
Bakato Mamak si Hetong,
"Diak kanduang si Rawan Pinang
Kok tidua usah kau lalok
Makan gulai usah kanyang-kanyang
Minun aia usah sajuak-sajuak
Awak den ka pai bajalan
Ka manarimo upah urang
Ka mancarikan pungguang tak basawok
Kapalo nan tak batukap
Tutuik pintu harek-harek
Jambolah lapiak daun pua
Talatak di ateh pagu
Usah kau tasintak-sintak
Manjalang awak den baliak."

Manjawab Kasumbo Hampai,
"Tuan hai Mamak si Hetong
Jan Tuan pai manggaleh
To kito pulang ka kiun
Ka Ulak si Tanjuang Bungo
Ka bawah unduang nan gadang
Asal lai amuah Tuan pulang babaliak
Karabau bantiang bulek injek Tuan
Rumah gadang injek si Rawan
Sabab kato den lah talampau
Lah mahamun lah mancacek
Tapi samaso kini nangko
Lah tahu di laku-lakū
Lah pandai babaso-baso
Bago sacamek duo camek
Bago salingkuang jo nagari
Kok katidiang hambo pareh
Sukatan amuah hambo lilik
Tuak kito babaliak suruik."

Gayuang haram ditangkikhnyo
Kato nan tidak dijawabnyo

Dek Mudo Mamak si Hetong
Inyo bajalan turun sakali
Baru tibo inyo di halaman
Bakato awaknyo akeh si Rawan,
"Tungkeklah pintu Rawan
Kunci tagok-tagok."
Bajalan Mamak si Hetong
Kasumbo Hampai manuruik di balakang
Bakato Kasumbo Hampai,
Bakato sambia baibaraek,
"Tuan hai Mamak si Hetong

Bao tambilanglah di Tuan
Kudian bao pangkua pulo
Bao hilanglah di Tuan
Kudian nyao timbua pulo

Kononlah Mamak si Hetong
Nambeknyo ka baranti
Mancaliak suruik lai tido
Bajalan juo inyo
Nan gaduh manuruik di balakang
Bak ka jauah inyo dakek
Bak ka dakek inyo jauah
Lah jauah inyo bajalan
Bapantun Kasumbo Hampai
Apolah buah pantunnyo,
A ayak dalam katidiang
Daun tarok limau manih
Tuan hai bao sairiang
Nan kalek hitam manih

Nambeknyo ka mahadok mancaliak
Suruiknyo lai tiado
Bajalan juo awaknyo
Lah lia sapangga hari
Pajalanan nak rang Mamak si Hetong
Bapantun Kasumbo Hampai
Apolah buah pantunnyo
Ramilah balai Kamang
Bakeh urang jua bali

Bantai basuo linduang jo langang
Elok barundiang jo nan kuli

Kononlah Mamak si Hetong
Indaklah gayuang ditangkikhnyo
Indaklah pantun dibalehnyo
Awaknyo bajalan juo
Nan Gadih manuruik di balakang
Dek untuang takadia Allah
Alah tibo di parantian
Di Bukik Silang-silang
Di baruah ngarai nan dalam
Di ateh bukik nan tinggi
Di jalan urang manggaleh
Apolah pahuni ngarai
Di dalam kok ula gadang
Di tangah taduang bakotaek
Di ateh labah mangirab
Duduak baranti Mak Hetong
Sanan lah batamu jo Kasumbo Hampai
Bakato Mamak si Hetong,
"Kasumbo Hampai janyo hambo
Apak Kakak urang batuah
Mamak Kakak urang rajo
Kok hanyo ibu urang kiramaek
Awak urang elok janyo urang
Ka pai Kakak jo hambo
Awak hambo urang yatim
Kok basuo musuah di jalan
Sialah nan ka malawan
Iko kuruihnyo badan hambo
Tulang di rusuak basumburan
Daki di pungguang lah baguluang
Kain hambo sacudiak ketek
Kiro ka panyaok orat sajo
Tapi ka baa pulo lai
Kakak lah tukang manuruik
Kok hambo suko mambao
Babaliak Kakak dahulu

Ka dangau si Rawan Pinang
Manjapuik kampia timbakau
Di biliak Mamak Hetong tidua.”
Diagak-agak di hati
Di gadih Kasumbo Hampai
Minun makannya lai tidak
Timbakau jo apo ka dibalinyo
Babaliak suruik nan jadi
Mak Hetong maniti ka subbarang
Ditakuaknyo titian cako
Jo rencong si Ameh Manah
Titian sudah tatakuak
Nan gadih lah tibo pulo
Maniti Kasumbo Hampai
Salenggang duo laiknyo
Lah tibo di tangah-tangah
Bakucak titian cako
Talalu patah sakali
Lah jatuah Kasumbo Hampai
Lah kiambang kiambangi
Lah bak baluik kanai palang
Lah kiabek kiabeki
Bakato Mamak si Hetong,
”Tangguangkan banalah di kau
Rasaikan banalah di kau
Kok elok urang kau galakkan
Kok buruak urang kau cacek
Itu ka baleh kato gadang
Itu baleh urang pancacek.”
Manjawab Kasumbo Hampai,
”Tuan hai Mamak si Hetong
Tuan ka pai bajalan
Hambo ka tingga dalam ngarai
Bao pantun hambo sabuah
Lihek katiko litak
Silau katiko lupo
Apo buah pantunnyo
Tinggi bukik Talago Kuan
Ka bawah banda rang Lasi

Rang Lasi bajua bantai
Kok jauah Tuan bajalan
Asa tak tadanga mati haram
Haram den ganti jo nan lain.”

Manjawab Mamak si Hetong,
“Indak den kalang-kalang
Rang Lang bajua dulang
Indak den jalang-jalang
Dapek ameh den pulang.”

Lah bajalan Mamak si Hetong
Lah sahari inyo bajalan
Cukuik tigo hari jo nangko
Minun tiado makan tiado
Jo a lah nasi ka dibali
Jo a lah gulai ka dituka
Bansaek nan tidak ulah-ulah
Ganok lurah tatajuni
Ganok bukik nan didaki

Kaba baraliah tantang nantun
Sungguah baraliah sanan juo
Baraliah bakeh nan gadih
Nan gadih Kasumbo Hampai
Bakato Kasumbo Hampai,
”Kak Ula nan gadang nangko
Pado den baputiah mato siko
Lah panjang lihia mancaliak
Lah putiah mato mamandang
Ibu tak datang-datangnyo
Bapak tak tibo-tibonyo
Lah tujuah hari dalam ngarai
Minun tidak makan tidak
Raso ka rompong bubun-bubun
Raso ka hilang nyao di badan
Raso ka putuih rangkai hati
Bak ka titiak darah tunjuak
Bak itu litak paruik den
Lulualah di Kak Ula

Jo luluua salulua habih
Paluiklah sapaluik putuih
Jan lamo hambo basakik.”
Manjawab ula nan gadang,
”Kok itu nan kau katokan
Sakijap mato
Sabuah nan den takuikkan
Di Mudo Mamak si Hetong
Awaknyo urang batuah
Awaknyo urang kiramaek
Moyangnyo bakubua di Bukik Gombak
Hiduik nan bakeh urang batanyo
Mati tampek urang bakaua
Itu sababnyo awak kau
Indak ka den makan
Takuik aden di inyiaknyo
Pado den luluua awak kau
Lapeh baridalah den dikau
Lapeh basukolah den dikau
Lapehlah ka lauik basa
Nak manjadi nago sati”,
Katonyo Kak Ula gadang,
”Kok den ka pai bajalan
Ambiaklah reno di kapalo den
Ambiaklah cincin sabantuak
di ikua den.”

Diamiaknyo cincin sabantuak
Diamiaknyo reno di kapalo
Reno dilulua masuak paruik
Cincin disimpan di sangguu

Lah bajalan Kak Ula gadang
Lah tingga Kasumbo Hampai
Lah kiambang kiambangi
Lah kiabek kiabeki
Birawari pulo nan gadih,
”Kak Taduang nan bakotat nangko

Pado hati den risau siko
Pantaklah sapantak mati.”
Manjawab Taduang nan bakotat,
”Indak den ka mamantak adiak
Takuik den di Mamak si Hetong
Anyo ujud pada Allah
Tarabang mangirab den maso kini.”
Taduang tak amuah mamantak
Labah tak amuah manggigik
Tingga nan gadih saurang diri
Alah sabulan dalam ngarai
Muko nan murak lah muram
Dagiang nan sunsuk lah sansai
Asa siang hari barisuak
Harinyo hari Jumaat
Baniat Kasumbo Hampai
Cincin den sicinto-cinto
Barang den cinto barang buliah
Sado makasuik sado sampai
Kok lai batuah cincin nangko
Kok lai balaku pinto den
Suruah tibo buruang borak
Buruang Borak buruang budiman
Buruang nan tahu bakaba
Buruang nan tahu batutua

Kononlah si Buruang Borak
Ikua malilik Gunuang Ledang
Paruah basambuang aso-aso
Kapak baturak aia ameh
Lah tibo si Buruang Borak
Bakato Kasumbo Hampai,
”Buruang janyo hambo
Lai hibo Buruang di hambo
Pailah nan hambo suruah
Ka itiak Muaro Itan
Ka ranah Payuang Sakaki
Ka bawah induang nan gadang
Akeh Mak Datuak Rajo Angek

Baolah cincin sabantuak
Baolah rambuik sahalai
Agiahkan ka Mamak hambo.”

Lah tarabang si Buruang Borak
Digungguangnyo rambuik sahalai
Dibaonyo cincin sabantuak
Adopun tarabangnyo si buruang Borak
Tarabang manyisik awan kuniang
Lah ditangkok hiruah kibuan
Lah dikanduang awan biru
Lah dakek kampuang nan gadih
Marahok si buruang Borak
Hinggok ka unduang nan gadang
Tampak di Rubiah Rando Kayo
To buruang saelok nangko
Tak buruang sapatuik iko
Kok di rumah Kasumbo Hampai
Barapo patuik hambo bali
Barapo harago hambo tuka
Manjawab si Buruang Borak,
”Bihai Rubiah Rando Kayo
Tidak den harago haragoi
Mako den datang ka mari
Mambao kaba den
Dari nan gadih Kasumbo Hampai

Tajatuah awaknyo kini
Ka dalam ngarai nan dalam
Di Bukik si Alang-alang
Di jalan urang manggaleh
Dek Manuruikkan Mamak si Hetong
Mamak Hetong tak amuah mambaonyo.”
Manjawab Datuak Rajo Hangek,
”Buruang anjiang buruang binatang
Buruang indak bapangaja
Mahino-hinokan awak
Salamat Bujang Adiak hai
Tariak juo sinapang di hang

Mak den tembak buruang nangko
Tak kato nan dikatokan.”
Manjawab si Buruang Borak,
”Mamak Datuak Rajo Hangek
Usahlah den ditembak
Kambangkanlah lapiak haluih
Mak den jatuahkan rambuik sahalai
Den lompekkan cincin sabuah.”

Bakato Rajo Hangek,
”Guguahlah tubuah larangan
Palulah janang pamanggia.”
Dari lurah urang mandaki
Dari bukit urang manarajuni
Lah tibo rakyaeck samuhonyo
Manyambah nan cadiak pandai,
”Ampun Tuanku rajo kami
Apo sabab janang dipalu
Di manokoh juja nan lapuak
Di mano juaro takuaian
Di mano dubalang rabuik rampeh
Di mano panghulu lancag hukum
Di mano nak rando nan bajuang.”
Manitah Datuak Rajo Hangek,
”Hai rakyat nan banyak nangko
Indaklah apo tingkah kalahinyo
Hanyo sabuah pinto hambo
Badiri kito samuonyo
Malihek rambuik nan gadis
Dibao si Buruang Borak.”

Bakato Rajo nan Hangek,
”Buruang Borak janyo denai
Lantiangkanlah rambuik jo cincin
Ka lapiak nan takambang nangko
Nak kami lihek samuonyo.”
Lah jatuah cincin jo rambuik
Dilihek cincin dek tukang
Nan mambuek dahulunyo

Bakato tukang nan mambuek dahulunyo
Bakato tukang cincin cako
”Io bananyo Tuanku
Cincin nangko buatan hambo
Lah ka tangah pulo Salamat
Mangiek rambuik nan gadih
Didapo sambilan dapo
Dijangka sambilan jangka
Bakato Salamat,
”Alah nan iyo iko Tuanku.”
Bakato pulo si Buruang Borak,
”Alah ka sanang hati Mamak
Alah picayo di kato den
Kini bak mano pikiran Mamak
Itulah rupo kamanakan
Lah duo bulan dalam ngarai
Minun tidak makan tidak
Manuruikkan Mamak si Hetong
Mak Hetong haram kok amuah mambao
Kok lai Mamak bamalu
Japuiklah Kasumbo Hampai
Ka dalam lurah nan tadi.”

Birawari Rajo nan Hangek
”Salamat Bujang,
Palulah tabuah larangan
Guguah janang pamanggia
Gumenta tabuah si Hulando
Di lurah urang lah mandaki
Di bukik urang lah manurun
Tidak tabado banyak urang
Tak tamuek di daun taleh
Di daun taruung lah panuah pulo
Tak tamuek di nan laweh
Di nan lakuang lah panuah pulo
Bakato hakim perdana basa,
”Ampun Tuanku rajo kami
Apolah sabab tabuah bapalu
Di mano dubalang rabuik rampeh

Di mano panghulu lincak hukum
Di mano gadih nan bajuang
Di mano juaro takuaian.”
Manjawab Rajo nan Hangek,
”Mulo tabuah den suruah guguah
Sabuliah bali jo pinto
Japuik Kasumbo Hampai maso kini
Ka Bukik Sialang-alang
Ka jalan urang manggaleh
Ka baruah ngarai nan dalam
Di baonyo di Mak Hetong
Dek untuang buruak di nyoo
Tajatuah Kasumbo Hampai
Tak amuah kalian pai
Baiak imam baiak khatib
Baiak tuo baiak mudo
Ka Solok ka Tanjuang Bungo
Kalian den bunuah samuonyo

Sabuah lai parentah den
Bao tambilang ciek surang
Bao ringgik sabuah surang
Ka balanjo dek kalian.”

Barakaek kabasaran Datuak Rajo Hangek
Dalam Ulak Tanjuang Bungo
Pailah umaek samuonyo
Mambao ringgik ciek surang
Mambao tam bilang sabuah surang
Manjapuik Kasumbo Hampai
Ka Bukik Sialang-alang
Lah jimaek umaek samuonyo bajalan
Bakato Rajo nan Hangek,
”Adiak den Salamat
Pailah cakau kudo di hang
Kudo nan balang baraci
Kaki nan rajah kaampeknyo
Satampam daun budi

Rajah kaniangnyo Kambang Manih
Kambang Manih janyo denai
Tungkuilah nasi saketek
Baduanlah di sapu tangan
Lah bajalan Rajo nan Hangek
Dipacu kudo nan balang baruci
Kudo tu pandai tabang
Sajam sampai sakali
Dek sangaek lari kudo tu
Saheto tahulua lidahnyo

Tidak lamo antaronyo
Lah tibo Rajo nan Hangek
Di Bukik Sialang-alang
Lalu turun di ateh kudo
Bajalan-jalannya sabanta
Mancari lurah nan dalam
Bakato Rajo nan Hangek,
"Duto bana buruang Borak
Bohong bana mo kironyo
Di mano Kasumbo Hampai jatuah."
Manjawab Kasumbo Hampai dalam ngarai
"Indaklah buruang itu duto
Mamak nan tak bahati
Mamak nan tak bajantuang
Saelok ikolah tubuah den
Sapatuik nangko kamanakan
Lah tigo bulan tak di rumah
Mamak rajo janyo urang
Anak luluih indak disalam
Hilang den indak dicari
Kok lai Mamak bajantuang
Kok lai Mamak balimpo."

Manangih Rajo nan Hangek,
"Kamanakan kanduang Kasumbo Hampai
Amuah den manjapuikkan sutan
Kaapo di den sutan, janyo kau."

Sadang barundiang-rundiang juo
Lah tibo rakyat nan banyak
Ado saurang puti pulo
Banamo Sidayang Sudah
Samo gadang jo Kasumbo Hampai
Kok tagaknyo samo tinggi
Kok diuji samo merah
Kok dikati samo barek
Bakato Sidayang Sudah,
"Diak kanduang Kasumbo Hampai
Dek lamo kito bajalan
Raso ka rompong bubun-bubun
Bak ka hilang nyao rihan
Bak ka putuih rangkai hati
Di siko Adiak basu onyo
Baalah juo den manariaknyo
Kok denai runtuah ngarai nangko
Adiak den kok ditimbunnyo."

Birawari Kasumbo Hampai
Anak rang cadiak candokio
"Mudah sakali manariak den
Suruah urang mancari rotan
Uleh rotan panjang-panjang
Pabuek laka gadang
Lantiakkkan ka dalam ngarai
Nak den masuakki laka nantun."

Lah dicari urang rotan
Lalu dipabuek kalaka
Indak lamo antaronyo
Lah sudah laka nantun
Lah dicampakkan masuak ngarai
Baharu sampai laka di bawah
Lah masuak Kasumbo Hampai
Lah dihelokan urang ka ateh
Lah ka ateh Kasumbo Hampai
Lah tibo pulo rang tuonyo
Iyo Rubiah Rando Kayo

Sarato Datuak Bandahoro
Mambao pakaian sasalin
Mambao baju saketek
Mambao inai saketek
Baharu tibo inyo bakato,
"Basuahlah gigi kau
Sikeklah abuak kau
Lakekkanlah kain kau

Mamakai Kasumbo Hampai
Muko nan muram alah murak
Abuak nan kusuik lah salasai
Bapantun Kasumbo Hampai,
"Mamak Datuak Rajo Hangek
Biai Rubiah Rando Kayo
Bapak den Datuak Bandaharo
Pacik pegang pitaruah den
Lihek katiko taragak
Silau katiko lupo
Latakan bana dalam hati
Nan jangan diubah-ubah

Kok jadi pandan den
Ka sugi jo daun lado
Kasai jo daun limau
Kapeh latakan di pinggan jorong
Kok jadi mati badan den
Kubuakan ka Bukik Sialang
Ka jalan urang manggaleh
Nak basuo jo Mak Hetong."
Lah babaliak Kasumbo Hampai
Lah sahari inyo di rumah
Lah duo hari jo nangko
Cukuik tigo hari jo kini
Hari tu hari Jumaaek
Alah sapanggalah matohari naiak
Bakato Kasumbo Hampai,
"Mamak Datuak Rajo Hangek

Awak hambo mandanga kaba
Anak Mamak nan ketek
Banamo Puti Mambang Suri
Sakik nan ukana alang-alang
Sakiknyo sairuak-iruak
Damamnyo babanja-banja
Antah ka mati antah ka hiduik
Aia diraguaknyo sambiluan
Nasi nyo makan raso sakam
Mamak pulanglah juo dareh
Ka rumah Si Mambang Suri.”

Lah pai Mamaknyo pulang
Ka rumah Si Mambang Suri
Iyo malah janyo hati
Bajalan bagageh-gageh
Dek sangaek pajalanannya
Iyo Datuak Rajo Hangek
Paluah lah untua untaian
Hangok lah gadang-gadang ketek
Bakato pulo Kasumbo Hampai ka apaknya,
”Apak Datuak Bandaharo
Pailah ka jamaaek
Hari lah hampai tangah hari
Apak jadi imam urang.”
Lah pai pulo apaknya
Bakato pulo inyo ka biainyo,
”Biai Rubiah Rando Kayo
Biai sudahkanlah tanun biai
Ka baa pulo lai.”
Ibu lah pai batanun
Apak pai ka juaaaek
Bakato pulo Kasumbo Hampai,
”Salamat bujang janyo den
Pailah mandikan kudo angku hang
Janiah di lua janiah di dalam.”
Kambang Manih o Adiak hai,
”Pailah kau manyasah-nyasah
Sasah di kau barasiah-barasiah

Cuci di luar cuci di dalam
Sabun di kau janiah-janiah
Sabalun putiah nambek kau pulang.”

Lah tingga Kasumbo Hampai
Surang sajo dalam rumah
Urang lah jimek pai bajalan
Lorong kapado rumah Kasumbo Hampai
Rumah gadang salingka gadiang
Salamo kuai malayang
Atoknyo kaco dindiangnyo camin
Pintu gadang duo puluah ampek
Pintu ketek duo baleh buah
Jimek batutuik samuonyo
Jan payah pulo bapak den
Urang banyak ka manyilau
Kasumbo Hampai ka mangamuak
Dapek pulo bana di Kasumbo Hampai
Mancabua nyo ka biliak dalam
Malantak peti manggewang
Babuni puputan Kaliang
Tatuka banta nan gadang
Barisi pakaian rumah
Dikambahkannya tirai jo kulambu
Tabantang tabia langik-langik
Baratua kasua tangah rumah
Diuraknyo pulo buntia sabuah lai
Maambiak rencong sahalai
Nan dititik (tukang) duo baleh
Disapuah tukang batujuah
Tajamnyo dencat-dencatan
Tak rencong sabiso nantun
Api-api tabang ka punggu
Tibo di punggu balalaran
Angok angak maik di kubua
Biso nan tidak katawaran
Kabaa pulo li lai

Kaba baraliah tantang nantun
Tidua nan gadih tangah rumah
Dipacikkan rencong jo suok
Disensengkan baju jo kida
Bakato saurang diri,
"Mako badan den ka den amuak
Malu den indak tatahan
Mamak rajo janyo urang
Ibu kayo janyo urang
Bapak batuah di nagari
Awak rang gadih janyo urang
Kahandak tidak kan laku
Pado hijuik eloklah mati
Isuak mati kini mati."
Dipiciangkan matonyo
Ditikamkannyo rencong ka dadonyo
Darah tasambua hukum pun sampai
Lah mati Kasumbo Hampai
Di hari sahari nantun
Harinyo hari Jumaek
Sadang tangah hari tapek
Indak lamo antaronyo
Lah pulang ibu dari batanun
Bapak lah pulang bajamaaek
Paman tibo di halaman
Salamat pulang mandikan kudo
Sikambang babaliak manyasah
Habih manangih samuonyo
Mandapati pintu batutuik
Bakato Rajo nan Hangek,
Ka urang nan dakek itu,
"O kawan urang bahampiang
Bari luruih Aden batanyo
Ka mano Kasumbo Hampai
Mako pintu ditutuiknyo."
Manjawab urang nan cako.
"Ampun Tuanku rajo kami
Haram lilah kok lai hambo manampak
Hambo manampak pintunyo cako

Lai kadangaran bapantun sabuah
Manangih saciek-ciek
Suaronyo sajo nan tadanga
Tubuahnyo tiado kalihatan.”
Lah badabok hati Rajo nan Hangek
Dibalahnyo pintu sabuah
Tabukak pintu sadonyo
Barakaek kabasarannya
Dicaliak hilia jo mudiak
Pandang jauah dilayangkan
Pandang hampia ditukiakkan
Sasek mamandang ka tangah rumah
Dicaliak darah lah tahanyua
Dipandang maik lah taunjua
Bakato Rajo nan Hangek,
”Ya Allah ya Rasulullah

Ya Saidi ya Maula
Ya Tuhanku junjungan denai
Garak Allah sudahlah di den
Ka apolah harato jo bando
Apo guno ameh jo perak
Apo guno urang den hukum
Kok suratan den kok lah nan sasek
Barih den ko lah nan buruak
Ka ikolah rupo kaonyo
Sia ka mahunyi rumah gadang.”
Bakato Reno dalam peruik Kasumbo Hampai
Nan diagiahkan ula nan dahulu,
”Itulah Tuanku Rajo Hangek
Kok samantang awak mahukum
Elok urang digalakkán
Buruak urang dicaceki
Buruak urang apo li'lai
Itu ka baleh kato gadaang
Tapi kok Tuan cari Mak Hetong
Buliah hiduik Kasumbo Hampai.”
Bakato Rajo nan Hangek,
”Ya Allah ya Junjungan

Ibilih ko lah nan maharu den
Urang surang indak nampak
Suaro sajo kadangaran
Adiak den Salamat
Palulah tabuah larangan
Nak rapek urang samuonyo
Nak tahu urang sakaliannyo
Bahaso Kasumbo Hampai lah mati
Jan kito tangisi juo
Baharu tau urang banyak
Nagari bahiru-hiru
Mancaliak maik nan gadih.”
Datang pulo Puti Dayang Sudah
Mambao payuang sabatang
Mambao cincin sabantuak
Mambao pakaian sasalin
Baharu tibo inyo bakato,
”Adiak kanduang Kasumbo Hampai
Pueh hati mande kanduang
Sanang hati mande kito.”

Kononlah Si Dayang Sudah
Lah bagilo-gilo awak
”Mamak den Rajo nan Hangek
Ambiak juo rencong di Mamak
Nak den tikam pulo badan den
Nak sakubua kami baduo
Apo guno den hiduik lai
Awak baduo tingga surang
Jo siapo den batolan samo gadang
Jo sia baruji samo merah
Jo siapo bakati samo barek.”

Kononlah urang nan banyak
Indak rintangkan apo-apo
Rintangkan Si Dayang Sudah
Samantaro maik di rumah
Dikuruang urang awaknyo

Ka dalam peti manggewang
Bakato Hakim Perdana Basa,
"Ampun Tuanku Rajo hambo
Nan bagala Rajo nan Hangek
Nan mano tanah ka dikali
Nan mano kayu ka ditabang"
Manjawab Rajo nan Hangek
"O kok itu Perdana Katokan
Awak den buliah pitaruah dinyo
Nan ka dilihek katiko lupo
Silau katiko taragak

Lah sampai mandi pandannya
Kusuaki jo daun lado
Kasai jo daun limau
Kapeh latakan di pinggan jorong
Lah sampai mati badannya
Kubuakan di Bukik Sialang
Di jalan urang manggaleh
Nak basuo jo Mak Hetong."
Bakato Hakim Perdana Basa
"O kaum nan banyak nangko
Nak urang Ulak Tanjuang Bungo
Kini baitu titah rajo kito
Patuiklah titah kito junjuang."
Bakato Sutan dalam nagari,
"Tuan Tantejo Maharajo Perpatih nan Sabatang
Kalau baitu nan ka eloknya
Baitu pitaruah di nan gadih
Jauah kubua kito kali
Ka Bukik Sialang-alang
Ka jalan urang manggaleh
Nak basuo jo Mak Hetong
Babaua urang tigo luhak
Surang urang Tanah Data
Surang Luhak Limo Puluah
Surang nak rang Luhak Agam
Kok nyo urang Tanah Data
Nak rang cadiak candokio
Nak rang cati bijaksano

Bagala Tantejo Maharajo
Tukang bungkuak Magek Masawi
Tukang haram buang kayu
Saheto ka laba-laba
Kok kaciak ka pasak suntiang
Kok bunta ka saok tumpang
Kok bungkuak ka tangkai pangkua
Baitu tando tukangnyo
Nak rang tukang Tanah Data
Kononlah nak rang Limo Puluah
Siak tiado malin amek
Kononlah mantik jo makna
Ganti syahadat pulang mandi
Bak itu tando malinnyo
Mangaji nyo di tangah rumah
Dakek maik Kasumbo Hampai
Tukang nak rang Tanah Data
Mabuek karando di pakuburan
Nak rang tukang Agam manggali kubua
Kubua sudah karando sudah
Lorong kapado karandonyo
Lantainyo ameh samato
Tukapnyo intan jo pudi
Pasaknyo kangso balarik
Kalang ulu urai bapadu
Bakato Datuak Rajo Hangek,
"Sabuliah bali jo pinto
Salaku-laku kahandak
Di lua manatiang maik
Bababan kalian samuonyo
Satangah manbao ringgik urai
Satangah mambao kain jimaik
Bababan samuonyo
Lah masuak maik nan gadih
Lah dibao urang ka Bukik Sialang
Ka jalan urang manggaleh
Alah sabanta urang bajalan
Alah duo banta urang bajalan

Lah dakek hampia ka tibo di sanan
Lah tibo di pakuburan
Sambayang nak rang Limo Puluah
Bagarak nak rang Tanah Data
Manimbulan nak rang Luhak Agam
Kubua lah sudah tatimbun
Dilatakan pulo mejan kubua
Mejan intan jo pudi
Puncaknya perak balanjua
Langik-langik kangso balanjua
Kaba baraliah hanyo lai
Sungguah baraliah sanan juo
Ka tangah urang tigo luhak
Tantejo Maharajo rang Tanah Data
Tamanggung rang Luhak Agam
Perpatiah rang Limo Puluah
Orang batigo badunsanak
Nan tahu diereng gendeng
Tahu tahu dikarang nan manungga
Tahu di adaek jo pusako
Ditatiangnya malah sadakah
Ba itu rang kayo mati

Pihak kapado sadakahnya
Urang nan buliah dahulu
Buliah sadakah bakawan
Bakain sakayu surang
Kudo gadang sakayu surang
Konon rang buliah kudian
Sadakah baungguak
Kok kain sakabuang surang
Jawi ketek sikua surang
Buliahlah umaek samuonyo

Bakato Datuak Rajo Hangek,
"Mano kito samuony o
Nan ado hadir di siko
Baiak Luhak Tanah Data

Baiak Luhak Limo Puluah
Sarato jo Luhak Agam
Di hari sahari nangko
Kito buntuah karabau saratuih
Kito urah padi samandah
Diantak tabu di lurah
Duo hari maik dalam kubua
Duo ratuiah kabau nan mati
Duo mandah padi nan kameh
Duo lurah tabu nan habih
Cukuik katigo harinyo
Tigo ratuiah kabau nan mati
Tigo mandah padi nan usai
Tigo lurah tabu nan alah

Kaba baraliah tantang itu
Sungguah baraliah sinan juo
Baraliah akeh Mamak Hetong
Lah baliak nijo dari Tiku
Kini mambao ringgik sabalik pinggang
Mambao pakaian sapuluah salin
Limo salin injek si Rawan
Limo salin injek nan gadih
Itu niaeck hati Mak Hetong
Inyo babaliak dari rantau
Urang lah tibo di kubua Kasumbo Hampai
Tatagun Mamak si Hetong
Dek mancaliak rancak kubua
Dipandang pulo kiri jo kanan
Dilengong hilia jo mudiak
Nampak dinyo urang
Baduo urang gubalo
Surang gubalo jawi
Nan surang gubalo kudo
Bakato Mamak si Hetong,
"Hai Tuan urang gubalo
Bari luruih hambo batanyo
Siapokoh nan punyo kubua
Tak kubua sarancak nangko

Kok mejan intan jo podi
Puncaknya perak balanjua
Langik-langik kangso samato
Rajo mano kolah nan wapat
Sutan mano ko lah nan mati.”

Marjawab urang gubalo,
”Indaklah rajo nan lah wapat
Bukan to sutan nan lah bakubua
Ikolah pusaro Kasumbo Hampai
Kamanakan Rajo nan Hangek
Anak Datuak Bandaharo
Jan Rubiah Rando Kayo
Matinyo mangamuak diri
Kalua dari dalam ngurai.”

Mandanga kato rang gubalo
Duduak bamanuanglah Mak Hetong
Indak lamo antaronyo
Dijalinyo rokok sabatang
Dikunyah siriah sakapua
Sadang dapek kiro-kiro
Sadang datang agak-agak
Bakato Mamak si Hetong,
Ka urang gubalo tadi,
”Hai Tuan urang gubalo
Lai amuah Tuan den suruah
Den bari ringgik ampek surang
Mambaokan sungkua sabuah
Baokan tambilang ciek.”
Nyo bari ringgik ampek surang
Lah galak nak rang gubalo
Balari ka rumah amainyo surang-surang
Lah tibo awaknyo di rumah
Bakato awaknyo ka amainyo,
”Mande kanduang janyo hambo
Bao ka mari tambilang ciek
Disasiah urang ampek ringgik.”
Baharulah dapek tambilang cako
Dibaonyo ka Mak Hetong

”Hai Tuan keduonyo,
Tantuilah kudo awak
Tantuilah jawi Tuan.”

Lah bajalan urang gubalo
Baharu tibo diliheknyo
Kudo lah baranak, jawi bak itu pulo
Lah heran urang gubalo
Wali Allah kironyo urang tu

Birawari Mamak si Hetong
Lah diluluuh baju sakali
Dikalinyo kubua Kasumbo Hampai
Sabanta inyo manggali
Duo banta inyo manyangkua
Tadorong karando nan gadih
Lah dikaluakkannya maik tu ka ateh
Dikambangkannya o kain saruangnya o
Dibujuanyo Kasumbo Hampai
Sudah itu ditimbuninya baliak kubua cako
Dilatakkannya o pulo pancangnya o

Sarato mejannya o sakali
Allahu Rabbi payah Mak Hetong
Puluah lah untauk untaian
Hangok lah gadang ketek
Makan tiado minun tiado
Sadang mangali kubua nantun
Dek karano payah bana
Lah pai Mak Hetong mandi
Sudah mandi nya mamakai

Disungkuiknya o Kasumbo Hampai
Nambek ratok ratik lai
Tiado bakato Mamak si Hetong
Ya Allah ya Rasulullah
Ya Sayyidi ya Maula
Ya Tuanku junjungan denai
Inyiak janyo den di inyiak

Bakubua di Bukik Gombak
Kok lai bak hiduik bak mati
Mati bakeh urang baniaek
Hiduik bakeh urang batanyo
Parlakukanlah pinto den
Kok lai malu ka tabangkik
Gadang nak baganti-ganti
Cadiak nak sakali surang
Hiduikanlah Kasumbo Hampai...

Kabasaran inyiaknyo garan
Lah hiduik Kasumbo Hampai
Talalu duduak sakali
Tahu barundiang jo Mak Hetong
Lalu bapantunlah awaknyo
Lah panek hambo mandaki
Lah sampai ka ruku-ruku
Ka paniang nan banyak
Lah panek hambo mananti
Lah tumbuah uban di kuku
Di kaniang awai nan banyak
Bakato Mamak si Hetong,
"Kakak den Kasumbo Hampai
Buek nan arek satia
Nan taguah diinyiak kito dahulu
Kok nyo hilang hambo cari
Kok nyo luluih hambo salami
Tagantuang buliah hambo kaik
Ko mah pakaian sasalin
Den bao dari rantau urang."

Lah mamakai Kasumbo Hampai
Labo galeh Mamak si Hetong
Rantak marantak susun kain
Girai gumirai tanti baju
Hirun gumirun gunci cawek
Batapak subang di pipi
Balawan galang di tangan
Manyisik cincin di jari

Pihak kapado sangguanyo
Sangguanyo bajum bai halai
Panggantuang duo puluh ampek
Pangarang sambilan halai
Siganyo manjalan mancik
Hinggok langau tunggang langgang
Bakato Mamak si Hetong,
"Kakak babaliaklah pulang
Ibu lah layua taragak
Bapak lah kuruih bakirò
Sajak Kakak tidak di rumah
Kumbang nala nali
Kabau lah manjadi guguak
Itiaklah manjadi undan
Padi manjadi pirau
Kakak babaliaklah pulang
Ka ulak ka Tanjuang Bungo
Ka bawah unduang nan gadang
Ka cubadak gadang tinggi
Kok hambo babaliak pulo malah
Suruik ka rumah induak samang hambo
Parniagaan nan banyak tingga kini."
Manangih Kasumbo Hampai,
"Tuan hai Mamak si Hetong
Kok hutang amuah den mambايا
Salah amuah den manimbang
Kok tarampok dengan muluik
Ngarai alah denai tarajuni
Kok salah dengan cacek
Pihak kapado badan diri Tuan
Kok rencong alah den minun
Talalu mati sakali
Kini baitu pulo kato Tuan
Tuan badoso pado Allah
Urang manuruik tak dibao
Bagantuang urang digajaikan."

Jadilah rusuah Mamak Hetong
Tidak ka jadi ka balai

Suruk ka Kuantangtanang
Tidak ka jadi bacarai
Suruk bakumpua bak banang
Batolan-tolanlah kito

Lah panek tangka batangka
Lah pueh bagigiah-gigiah
Babaliak pulang Mamak Hetong
Alah Sabanta nan bajalan
Hari manjalang tangah hari
Tibo nyo di rumah
Bakato Mamak si Hetong,
"Adiak kanduang si Rawan Pinang
Kakak kau pulang manggaleh."
Lah jago adiak tu tidua
Tasintak si Rawan Pinang
Talalu bangun sakali
Bakato si Rawan Pinang,
"Ya Allah ya Rasulullah
Ya Sayyidi ya Maula ya Junjungan
Kok malu alah tabangkik
Barilah pintak ba a inyiak
Adokanlah rumah gadang ciek
Sarato dengan pakaianyo."
Lah ado rumah nan gadang
Sarato jo alaek pakaianyo
Sarato kabau jo bantiang
Sarato dangannyao
Barakaek pintak si Rawan

Bakato Kasumbo Hampai,
"Tuan hai Mamak si Hetong
Parlakukanlah kahandak hambo kini
Kito bunuah kabau tujuah puluah
Kito kawin maso kini."
Manjawab Mamak si Hetong,
"Adiak kanduang Kasumbo Hampai
Palakukanlah kahandak den
Suruah datang ka mari Mamak kau

Nan bagala Rajo nan Hangek
Suruah datang bapak mande kau
Panggia Tuanku Haji Kaciak Mudo
Itu nan ka mangawinkan kito.”
Duduak bamanuang Kasumbo Hampai
”Cincin den sicto-cito

Barang den cinto barang buliah
Cincin diagiahkan ula
Tibolah ba a buruang borak.”

”Kakak den Kasumbo Hampai
Mangalah hambo Kakak panggia
Apo tasundak di hetongan
Apo gaduhan dalam hati.”
”Diak kanduang si Buruang Borak”,
Katonyo Kasumbo Hampai,
”Mako Adiak den panggia
Tabanglah Adiak tinggi-tinggi
Hinggoklah ka unduang nan gadang
Suruah ka marilah Mamak den
Sarato jo mande kanduang den
Katokan Kasumbo Hampai
Lah hiduik dibao Mamak si Hetong.”

Jadilah tabang Buruang Borak
Ka kampuang Kasumbo Hampai
Tibonyo di unduang nan gadang
Mandangkuang-dangkuangkan paruah
Maliuak-liuakkan ikua
Mahampai-hampaikan sayok
Sayok batulih aia ameh
Paruah basambuang aso-aso
Ikua malilik Gunuang Ledang
Tampak di Datuak Rajo Hangek
Bakato si Buruang Borak,
”Tuan Datuak Rajo Hangek

Iyo kiramaek Mamak si Hetong
Kasumbo Hampai lah hiduik
Di rumah si Rawan Pinang
Disuruahnyo hambo akeh Tuan
Manjapuik maso kini.”

Iyo takana agak-agak
Di Datuak Rajo Hangek
Dipalu tabuah larangan
Diguguah canang pamanggia
Co biko tabuah nan banyak
Gumanta tabuah si Hulando
Babaua urang nan banyak
Dari lurah urang lah mandaki
Dari bukik urang lah manurun
Indak tabado banyak urang
Tak tamuek di daun taleh
Di daun taruang lah panuah pulo
Tak tamuek di nan laweh
Di nan lakuang lah panuah pulo
Bakato Hakim Perdana Basa
Kapado Datuak Rajo Hangek,
”Mangapo kami Tuan panggia
Di mano dubalang rabuik rampeh
Di mano pangulu lancak hukum
Di mano nak rando nan bajuang
Di mano tabiang nan basisiak
Di mano juja nan lapuak.”
Bakato Rajo nan Hangek,
”Ukan to juja nan lapuak
Ukan dubalang rabuik rampeh
Ukan Tuanku salah kitab
Ukan nak rando nan bajuang
Sabuliah bali jo pinto
Salaku-laku kahandak den
Dari rakyat nan banyak nangko
Kito japuik Kasumbo Hampai
Ka rumah si Rawan Pinang
Kito tobaek akeh Mak Hetong

Kito turunkan rajo akehnyo.”
Bakato Tuanku Rajo Hangek,
”Mano Tuanku Haji Mudo
Kok lai buliah kahandak den
Panggialah urang tigo luhak
Panggia Luhak Tanah Data
Panggia Luhak Limo Puluah
Sarato jo Luhák Agam.”
Dilapehnyo si Buruang Borak
Alah tabang ka Tanah Data
Tibo di rumah Mangkuto Sutan
Bakato si Buruang Borak,
”Ampun Tuan Mangkuto Sutan
Hambo dilapeh Haji Kaciak
Manjapuik tukang bungkuak Magek Mansawi
Pandai manarah manilantang
Tukang tiado buang kayu
Kok sayik ka lambai-lambai
Kok bunta ka saok tumpang
Kok ketek ka pasak suntiang
Kok bungkuak ka tangkai pangkua
Baitu tando tukangnyo
Nak rang Luhak Tanah Data

Birawari pulo Datuak Mangkuto Sutan
Nak rang cadiak bijaksano
Pandai maukua maagakkan
Dipalunyo tabuah larangan
Gumanta tabuah si Hulando
Kalua anak mudo-mudo
Kalua anak sutan-sutan
Takajuik urang dalam kampuang
Janang pamanggia lah baguguah
Urang banyak bahiru-hiru
Alah tibo umaek di halaman
Bakato Datuak Pandeka Basa,
”Ampun Tuanku Mangkuto Sutan
Apo sabab tabuah baguguah
Mako janang babunyi.”
Manjawab Mangkuto Sutan,

”Mulo tabuah hambo guguah
Mulo rakyat hambo panggia
Kanai suruah di Rajo Hangek
Ka Ulak ka Tanjuang Bungo
Ka itiak Muaro Intan
Ka ranah Pulau Guntuang
Karambai atau tungku
Ka bawah unduang nan gadang
Ka rumah Kasumbo Hampai
Piliah di Datuak urang tukang
Tukang bungkuak magek mansawi

Pandai manarah manilantang
Pandai marapek dalam aia
Tukang tidak buang kayu.”

Mupakaek datuak cako
Dipiliah dalam dipiliah
Basuo urang batigo
Mamakai mangkuto sutan
Sarato jo parampuan
Banamo Puti Awan Tasingik
Kok diagak diagiahkan
Maha lah sutan tandiangnyo
Maha lah gadih lawan duduak
Nan kok diagak diagiahkan kapado romannyo
Ya Allah ya Rasulullah
Ya Sayyidi ya Maula
Kok dihetong ka ruponyo
Mukonyo bagai bulan panuah
Pipinyo pauah dilayang
Kaniangnyo kiliran taji
Abuaknyo landia disintak
Kaniangnyo bantuak taji
Dituan daun kaja mangaja
Lorong pihak sangguanyo
Sanggu bajumbai halai panggantuang
Panggantuang duo puluah ampek
Pangarang sambilan halai

Siganyo manjalan mancik
Baitu linggih sanguanyo
Pihak kapado pakainyo
Kapeh Kuantan Batang Hari
Dipageh badambun-dambun
Digatiah anak rang baisang
Ditanun anak rang baparuah
Mauleh ka lidah aia
Mamutuih ka lidah api
Tanun garagasi tuo bauia-uia
Manyasok baminggak bamego-mego
Bapucuak rabuang pipinyo
Tidaknyo puda dek paneh
Indaknyo liuak dek ambun
Tidaknyo jigah dek hujan
Mamakai Awan Tasingik
Rantak marantak susun kain
Hiri gumiri gunci cawek
Irun gumirun tanti baju
Batapak subang di pipi
Balawan galang di tangan
Manyisik cincin di jari
Bajalan mangkuto sutan
Ka kampuang Kasumbo Hampai
Alah sarantang pajalanan

Lah dakek hampiang ka sampai
Aluran tibo di sinan
Mandariang silindik jantan
Bakukuak kinantan cucai
Mambaleh sibiriang kuniang
Manggadabiak kudo nan gadang
Mambilobok baruak nan tungga
Tibo urang samuonyo
Urang Limo Puluah
Siak tidak malin amek
Kononlah mantik jo makna
Ganti sahadaeak pulang mandi
Bak antun tando malinnyo

Bakato Datuak Rajo Hangek,
"Mangkuto Sutan janyo den
Sabuliah bali jo pinto
Salaku-laku kahandak den
Bueklah burak pararakan
Panjapuik Mamak si Hetong
Jo gadih Kasumbo Hampai."
Hampialah sahari bagarak
Alah duo hari urang bakarajo
Cukuik tigo hari jo kini
Burak lah sudah sakali
Bakato Datuak Rajo Hangek,
"O urang nan tigo luhak
Luhak Tanah Data surang
Luhak Limo Puluah surang
Luhak Agam surang
Kalau urang Tanah Data
Bagala Mangkuto Sutan
Kalau Luhak Limo Puluah
Bagala Tantejo Maharajo
Urang Luhak Agam
Bagala Katumanggungan
Tahu di adat jo pusako
Tahu maagak maagiahkan
Tahu maukua manjangkokan
Urang nan batigo nantun
Kapalo adaek dalam kampuang
Urang patuik dalam nagari
Kok pai bakeh batanyo
Pulang tampek babarito
Mari kito bajalan kini-kini."

Lah pai urang sadonyo
Sarato anak sutan-sutan
Sarato anak mudo-mudo
Nan patah pai batungkek
Nan buto pai bairik
Nan bisu mimih-mimihi

Manjapuik Kasumbo Hampai
Lah dakek hampia ka sampai
Aluran tibo di sinan
Lah sampai Rajo nan Hangek
Jawek salam jo Mak Hetong
"Ampun Tuanku Rajo Hangek
Tidak patuik salam dijawek
Mande hambo panjua sadah
Bapak hambo panjua padi
Pado hino Tuanku batukuak-tukuak
Malu Tuanku batam bah-tambah
Cacek kok datang kudian
Bansaek hambo tak tarulah-ulah

Minun makan hambo lai tidak
Gulai satangkai panghidupan
Aia sagaluak nan diminun
Baitu suka mikin hambo."
Manangih Kasumbo Hampai
Awai sauwai-uwai
Inguik sainguik-inguik
Sak saisak-isak

Paluah disipaekkan jo suok
Aia mato sipaek jo kiða
Kodek lah goncang giruangan
Tibo Puti Awan Tasingik
"Aciak Kasumbo Hampai
Jan hati diparusuah
Kini baitulah di Tuan
Tuan hai Mamak si Hetong
Sabuliah bali jo pinto
Salaku-laku kahandak denai
Kok kupua amuah kami tobat
Nan kok salah amuah kami maisi
Kok gawa amuah kami suruik
Kok salah amuah ditimbang
Tuan nikah maso kini
Harato jo bando nyiak Tuan
Ameh perak buék nyiak Tuan."
Lah tibo Haji Kaciak Mudo

Lah kawin Kasumbo Hampai
Baharu sudah nikah
Dijawek Mak Hetong
Babaliak sakali ka rumah Si Rawan Pinang
Sarato dengan Kasumbo Hampai
Alah Sabulan duo bulan
Lah cukuik pulo tigo bulan
Sudah itu bakato Mak Hetong,
"Ya Allah ya Rasulullah
Ya Sayyidi ya Maula
Ya Tuanku junjungan den
Inyiak jo den di inyiak
Nan bakubua di Bukik Gombak
Hiduik bakeh urang batanyo
Mati bakeh urang bakaua
Kok nan dimaksud alah sampai
Nan diama alah pacah
Kini palakukanlah permintaan den
Bari baa aden anak jo buah
Ka palawan hati rusuah
Ka parintang hati risau
Ka lawan hilia mudiaik
Ka lawan batolak jan baandai."

Dek untuang takadia Allah
Pintak ka balaku dinyo garan
Lah dalam hamil Kasumbo Hampai
Lah cukuik sambilan bulan
Asa siang hari barisuak
Harinyo hari Jumaaek
Lah sakik Kasumbo Hampai
Sakik ka maadokan anak
Lah ado anaknyo garan
Lah ado anak laki-laki
Tibo di lantai lantai patah
Tibo di tanah tanah lambang
Tibo di sandi sandi balah
Baharu ado baharu banamo
Banamo Sidawan Pakan

Lah diambiaknyo di Mak Hetong
Dipangkunyo di haribaan

- Lalu bakato Mak Hetong,
"Kok den agak den agiahkan
Kok disanjuang jo elok ang
Mahalah rajo lawan duduak
Sukarlah puti ka jodo ang
Kok den agak den agiahkan
Kok den sanjuang jo tubuah ang
Ruai bak anak kudo cicih
Bak anak kambang bak lubuak di pamarun
Bak jaguang tangah duo bulan
Maruai bak padi masak
Muko ang bagai bulan panuah
Hiduang bak talua bondo
Kaniang kiliran taji
Gigi kalimbojo masak

Bibia ang limau sauleh
Kok daguak dalimo rangkah
Batang lihia mundam di larik
Anak den Sidawan Pakan
Dareh lah ang gadang
Kok kusuik nak salasai
Kok karuah nak nyo janiah."

Manangih Sidawan Pakan
Dirintang indak tarintang
Awaknyo manangih juo
Dibari susu nyo tak amuah
"A to lah nan ang tangihkan
A to lah nan ang risaukan
Karabau bantiang tayok di padang
Itiak tanang di muaro
Kambiang panuah di baluka
Sawah gadang sabuah banda
Kapuak kaciak salo manyalo

Di tangah sibayau-bayau
Di tapi sitangguang lapa
Bapantang luhak dikauik
Minuman dagang nan lalu
Makanan urang kampuang ang
Sabuah anyo pantangnyo
Asa jan dibuang-buang
Baitu tando kayo ang Daun
Antoklah antok!
Apo juo nan ang rusuahkan.”

Sajak Mak Hetong baliak
Ka rumah si Rawan Pinang
Rajo Hangek indak suni lai
Manyuruah manjapui Mak Hetong
Takuik bana awaknyo ka Mak Hetong
Kini lah tahu di salah diri
Lah pandai babaso baso
Lah tahu bakaum kaluargo
Lah tahu baranak bakamanakan
Mak Hetong nan tak amuah juo
Sabab kato Rajo nan Hangek
Amun jo cacek salamo nangko
Bak tadanga juo baru
Bak duri dalam dagiang
Bak api dalam sakam
Antah kok mati Rajo Hangek

Mako Mak Hetong amuah pulang
Ka Ulak ka Tanjuang Bungo
Ka itiak muaro itan
Ka bawah unduang nan gadang
Ka baa pulo li lai

Kononlah Sidawan Pakan
Gadang bak diamba-amba
Cadiak bak diaja-aja
Lah tujuah tahun umuanyo kini
Bijak nan ukán alang-alang

Lah tahu diereng gendeng
Lah tahu di buruak baiak
Pandai bana bakato-kato
Kaduo pakaro pulo kuaeknyo
Ulang-ulang pandek
Taulah-ulah kuaeknyo
Samulo jadi indaknyo
Taluak di nan tajam
Barakaek Allah batolong atehnyo
Bakato Sidawan Pakan,
"Iyo janyo den di Amai
Bari luruih aden batanyo
Di mano kampuang halaman kito?"
Majawab Kasumbo Hampai,
"Ba apo baitu usua pareso ang?
Bakato Sidawan Pakan,
"Mako den usua den pareso
Iyo janyo den di Amai
Tantukank
Tantukan kampuang halaman kito
Kok tak Amai tantukan
Banang situka lawan lihia
Rencong Aceh lawan dado."
Manjawab Kasumbo Hampai,
"Usah ang rusuah bana lai
Pinta izin akeh bapak ang."

Bakato Sidawan Pakan,
"Bapak janyo den di Bapak
Tunjuakkan kampuang halaman den
Nan mano bana koto nagari
Tak amuah Bapak manunjuaakan
Sayang amak sado itu
Kasiah amak sado nantun."
Manjawab Mamak si Hetong,
"Buyuang jo den di buyuang
Apo bana ang rusuahkan
Kabau jo bantiang tayok di padang
Urang dangan sakarek koto."

”Bapak janyo den di bapak
Tak balaku kahandak den
Banang satuka lawan lihia.”

La’u lah berang ayah kanduang
Manangih Sidawan Pakan
Dirintang indak tarintang
Birawari si Rawan Pinang
Anak rang cadiak candokio
”Antoklah Dawan antok
Apo bana nan ang rusuahkan
Aso lai antok manangih
Nak den bari baju rabang tarabangan
Pintak ka Amai ang cincin sicinto-cinto
Apo dicinto apo buliah
Nak pueh hati Bapak kanduang ang.”

Lah dimintanyo cincin akeh amainyo
Dilakekkannyo baju nantun
Tabang mangirab nyo tinggi-tinggi
Tibo di unduang nan gadang
Marahok Sidawan Pakan
Diliheknyo kampuang lah alah
Kabau lah jadi batu
Itiak lah jadi undan
Padi lah manjadi piran-piran
Kambiang manjadi nalo-nali
Urang dangan baserak-serak
Lalulah duduak Sidawan
Duduak mangana diri
Dibakanyo kumanyan putiah
Asok mandulang ka ateh langik
Harum satahun palayaran
Mulo manyaru Sidawan,
”Ya Allah ya Rasulullah
Ya Sayyidi ya Maula
Ya Tuhanku junjungan den
Inyiak janyo den di inyiak
Nan bakubua di Bukik Gombak

Kok lai bak hiduik bak mati
Hiduik buliah rang batanyo
Mati buliah rang baniaek
Cincin den sicinto-cinto
Apo den cinto apo buliah
Apo dimaksud apo sampai
Palakukanlah baa kahandak den
Adokan kabau bantiang den
Adokan itiak ayam den
Sampurnokan rumah tanggo den.”

Balaku pinta Sidawan Pakan
Lah ado samuonyo
Bakato niniaknyo,
Nan diam di rumah itu,
”Buyuang datang dari mano ang cako?”
Antah titiak dari langik
Antah tabusuik dari bumi
”Niniak janyo den di inyiak
Tatkalo maso dahulu
Lailah niniak nan baranak babuah?”
”Buyuang ketek”, janyo niniaknyo,
”Mangapolah ang usua ang pareso
Awak ang ketek baharu
Nan Makah tumpuak nagari ang
Mako ang tibo ka mari
Kok itu nan ang tanyokan
Lai den baranak padusi
Banamo Kasumbo Hampai
Tangah dibao uantuang buruak”
”O kok itu niniak katokan
Itulah nan mande kanduang
Tingga di rumah si Rawan Pinang
Dunsanak Bapak kanduang hambo.”
”Kok itu janyo ang buyuang
Bak apo mangumbalikan mande ang pulang
Tujuak ajarilah den di ang.”
”O laikoh Niniak badunsanak

Badunsanak sudaro laik-laki?"

"O lai Buyuang

Bagala Rajo nan Hangek

Diangkek urang jadi rajo

Nan hangek dalam nagari

Mambunuah tidak batanyo

Mancancang indak mamampeh

Tahu di hilia jo mudiaik."

"Kini baitulah di Niniak

Pailah ka biliak dalam

Lantakkan peti manggewang."

Lah pai niniaknyo cako

Malantak peti bagoyang

Babuni puputan kaliang

Tabuka buntia nan gadang

Baisi rencong sahalai

Dititiak tukang duo baleh

Disapuah tukang batujuah

Diganggam bakato-kato

Disingkok batutua-tutua

Baharulah buliah rencong sakali

Bakato awaknyo ka niniaknyo,

"Bari luruih aden batanyo

Di mano rumah Datuak Rajo Hangek

Nak den pai akehnyo

Pai bapasiah-pasiah langkah

Pai mambuang-buang paluah buruak

Amak den cubo agak sajamang

Sabab baliau maharu-haru

Gadang nak malendo sajo

Samantang awak rajo dalam nagari

Tidak dikana malu jo sopan

Baiak ka kaum kaluargo

Ka rakyat talabiah-labiah

Kok lai batolong di Allah

Tahadok kapado badan hambo

Bak ayam pulang ka pautan

Cacek tiado binaso tiado karano

Mako baitu bana
Takalo mulo mande ka larek
Dek ulah baliau juo
Elok urang dicaceki
Buruak urang dihinokan
Awak rancak janyo awak
Awak mulia janyo awak
Awak rajo di nagari
Nan tak tahu di kayo Allah
Kok indak mati Rajo Hangek
Alamaek nagari tak salamaek
Taranak tidak ka manjadi
Anak buah habih bajalan
Bapak jo mande larek pulo.”

Bakato niniaknyo cako,
”O Buyuang janyo den hai
Mangapo baitu bana
Buyuang kaciak lai baharu
Kok umua satahun jaguang
Darah satampuak pinang
Kononlah Datuak Rajo Hangek
Indaknyo talok di nan tajam
Upuh jo racun disasoknyo.”
”Kok itu Niniak katokan
Tak hambo takuik tantang itu
Kok lai Allah manolong
Dangakan sahajo baritonyo.”

Kononlah hati Sidawan
Indak dapek disuruikkan lai
Bulek lah buliah digolekkan
Bakato niniaknyo cako,
”Buyuang janyo di buyuang
Den tagah awak ang indak tatagah
Ka baa janyo den lai
Kok nak tahu ang
Di rumah Datuak Rajo Hangek
Hiliakan jalan nan luruih nangko

Lah nampak banyak jalan basimpang
Turuikkan jalan ka suok
Mancaliak kiri jo kanan
Mamandang Buyuang bakuliliang
Lah nampak rumah baanjuang
Itulah rumah inyiak ang
Nan bagala Rajo nan Hangek.”

Bajalan turun Sidawan
Dituruikkan jalan nan luruih
Lah tampak jalan basimpang
Mangelok inyo ka suok
Dipandang kiri jo kanan
Pandang jauah dilayangkan
Pandang hampia ditukiakkan
Lah tampak rumah sabuah
Bagonjong batatah timah
Baanjuang kiri kanannyo
Bapikia Sidawan Pakan
Iyolah agaknyo rumah Datuak Rajo Hangek
Mandabok inyo ka halaman
Lah tibo di antakan janjang
Bahimbau Sidawan Pakan,
“O Inyiak Datuak Rajo Hangek
Turunlah Inyiak sabanta
Hambo mambao kaba baiak.”
Mandanga kato nan bak kian
Lalulah berang Datuak Rajo Hangek
Marentak turun ka halaman
Mahariak mahantam tanah
”Anak bincacak anak bincacang
Anak ngiang-ngiang rimbo
Anak cancang panarahan
Batumjuak bapangaja indak
Indak tahu barajo-rajo
Indak tahu baadaek-adaek
Lah iko lamonyo den rajo
Rajo dalam nagari
Alunlah urang mambari den malu

Alun urang tak takuik di den
Alun urang marauak di halaman
Iko pulo ma
Iko pulo muah baharu
Indak ang tahu rajo den
Adenlah nan Datuak Rajo Hangek
Nan hangek dalam nagari
Kok pai indak batanyo
Pulang indak babarito
Malenggang indak tapampeh
Mambunuah indak mambangun
Konon mati ang di siko
Nan mati anjiang sajo
Indak siapo nan ka mandakwa.”

Lah berang Sidawan Pakan
”Bukan hambo kurang pangaja
Ukan toh hambo tak tahu
Ukan toh hambo kurang tanyo
Tahu bana hambo di Datuak
Datuak Rajo Hangek janyo urang
Tapi taraso di hati hambo
Datuak nan tak tahu baadaek
Tak tahu malu jo sopan
Tak tahu baranak bakamanakan
Rajo adia nan disambah
Rajo zalim nan disanggah
Itu mako indak patuik
Hambo manyambah Datuak.”

Lah bangih Rajo nan Hangek
Lah manggaratak-garatakkkan garaham
Mukonyo sirah sirah padam
Lah basah baju di paluah
Ditangkoknyo Sidawan Pakan
Mahilak Sidawan Pakan
Lah tajulua Rajo nan Hangek
Tajaja muko ka tanah
Lah bakumua-kumua darah

Nyo jago sakali lai
Dilalahnyo Sidawan Pakan
Ditinjunyo sakali lai
Malompek Sidawan
Lah tibo tangan Rajo nan Hangek
Di dindiang lumbuang
Barakaek kuaek tinjunyo
Taban lumbuang tu sakali

Padi lah baserak-serak
Lah dicotoki ayam banyak
Lah makin berang Rajo nan Hangek
Hangok lah gadang gadang ketek
Paluah lah untak untaian
Lah tabaliak tanah halaman
Lah babunyi karabau lago
Lah eboh urang di nagari
Habih datang samuonyo
Laki-laki parampuan
Gadang ketek tuo mudo
Bakato Sidawan Pakan
Kapado Datuak Rajo Hangek,
"Mangapo Datuak baitu bana
Indak elok urang pamberang
Elok juo urang saba
Cubolah Datuak pikia bana
Alun patuik Datuak bacakak jo hambo
Hambo surang paja ketek
Datuak lah rajo janyo urang
Kok mati hambo di siko
Iyo bana bak kato Datuak
Kok mati mati anjiang sajo
Datuak kok luko di hambo
Mambari hangik salamo hiduik
Mangapo Datuak lah ka baitu
Sakalipun kato
Lai buliah dipakatokan
Salah buliah ditimbang
Hutang buliah dibayia

Kok kato banyak nan elok
Kini bari mauh hambo di Inyiak
Hambolah nan banamo Sidawan Pakan
Mande hambo Kasumbo Hampai
Bapak Hambo Mamak Hetong
Lirahkan nyao Inyiak
Inyiak lah banyak badoso
Mangubuakan mande hambo hiduik-hiduik
Makonyo datang hambo ka mari
Ka mari ka manuntuikkan baleh.”
Disintaknyo rencong di Sidawan
Rencongnyo buatan Aceh
Saruang ameh hulu suaso
Saruang batatah dengan pudi
Hulu baturak dengan intan
Tajam nan ukar alan-alang
Rambuik sahalai putuih juo
Jajak ditikam mati juo
Diamuaknyo Rajo nan Hangek
Lah bak mancancang batang taleh
Lah tasambua darah kalua
Mangalia tangah halaman
Lah mati Rajo nan Hangek
Urang manggigia samuonyo
Habih takuik sakaliannyo
Maliek Sidawan Pakan
Tunduak manyambah samuonyo
Banyaklah gisuih dangan bisiak
”Iyo batuah urang nangko
Kuaek kaba moh garan
Pandeka ukar kapalang
Elok kito tunduak akehnyo
Apo katonyo kito ikuik
Apo suruahnyo kito karajokan
Apo tagahnyo kito hantikan
Pado kito dibunuahnyo hiduik-hiduik.”

Bakato Sidawan Pakan,
”Hai kito nan banyak nangko

Lailah amuah samuonyo
Batolan baandai dangan hambo
Gadang ketek tuo mudo
Laki-laki parampuan
Katokanlah kini-kini.”
Manjawab urang nan banyak,
”Lorong kapado bicaro rang kayo
Tidak kami manumang lai
Kami mangikuik samuonyo
Gadang ketek tuo mudo
Laki-laki parampuan
Jauah amuah kami manjapuik
Hampia nak kami jangkau
Ka bukik kami daki
Lurah kami turuni
Barek nak kami pikua
Ringan nak kami jinjiang.”

Bakato Sidawan Pakan,
”Kalau baitu bana
Bulek lah buliah digolekkan
Pipih lah buliah dilayangkan
Lah bulek aia dek pambuluah
Lah bulek kato dek mupakaek
Lah sanang hati hambo kini
Sabuah pintak hambo
Kapado kito nan sado nangko
Barisuak pagi-pagi
Kito bajalan samuonyo

Gadang ketek tuo mudo
Laki-laki parampuan

Baiak imam baiak khatib
Manjapuik mande kanduang
Sarato jo bapak kanduang
Ka rumah Amai Rawan Pinang
Kito angkek baliau jadi rajo.”

Manjawab urang nan banyak
"Kok baitu kato rang kayo
Kami manarimo samuonyo."

Asa siang barisuak
Urang lah rapek samuonyo
Gadang ketek tuo mudo
Laki-laki parampuan
Nan buto datang batungkek
Lah lumpuah datang bainsuik
Nan pakak datang bagisuik
Allahu Rabbi banyak urang
Bak anai-anai bubuih
Bak kaluang pulang patang
Ka manjapuik Mamak Si Hetong
Sarato jo Kasumbo Hampai
Ka rumah Si Rawan Pinang
Bakato Hakim Perdana
Kapado Sidawan Pakan,
"Mano Rang Kayo janyo hambo
Anak buah alah siap
Kito barangkek sakali
Karajo elok jan dilambekkan
Nak jan ditimpo karajo jahek."

Lah bajalan urang samuonyo
Bajalan baunduang-unduang
Barapo sorak dangan sorai
Barapo tari dangan mencak
Babuni rabab jo kucapi
Babuni badia jo sitinggar
Raso kiamaeck bumi Allah
Ka pakaklah talingo
Bak karompong bubun-bubun
Alah sarantang pajalanan
Lah dakek hampia ka tibo
Aluran tibo di sanan
Lah tampak rumah si Rawan Pinang
Takajuik Mamak si Hetong

Gumanta Kasumbo Hampai
Pucek baniah Si Rawan Pinang
Manjanguah Mamak si Hetong
Dicaliak urang lah banyak
Sidawan balari pulang
Bakato Sidawan Pakan,
"Mano Bapak kanduang hambo
Sarato Mande kanduang hambo
Usah Bapak takuik lai
Usah Mande cameh pulang
Ukan to urang datang buruak
Urang datang jo elok
Ka manjapuik kito samuonyo
Mambao pulang ka nagari
Karano Inyiak Datuak Rajo Hangek
Lah mati baliau kapatang
Hambo tikam jo karih
Alah ka sanang hati Bapak
Kini alah ka lamak nasi dimakan
Alah ka sajuak aia diminun
Sabab baliau maharu-haru
Sabab baliau mambuncah-buncah."

Heran tapakua Mamak si Hetong
Mandanga barito Sidawan
Tunduak mangucap hanyo lai
Mamikiakan bagak anak kanduang
Mañgana bijak Sidawan
Heran bacampua jo riang
Karano Datuak Rajo Hangek
Lah sampai ajal
Urang lah datang manjanguak
Basegeh Mamak si Hetong
Bakameh si Kasumbo Hampai
Tagak badiri si Rawan Pinang

Kononlah Mamak si Hetong
Hati nan riang ukan alang-alang
Bak ka titiak minyak muko

Bajalan turun sakali
Urang banyak manyambah samuonyo
Babunyi badia maso itu
Babunyi gandang pararkan
Basabuang payuang kiri kanan
Manyambah Hakim Perdana Parinai
"Tuanku bajalan dahulu
Nak kami mangiriang di balakang."

Lah bajalan Mamak si Hetong
Urang banyak mangiriang di balakang
Alah sabanta nyo bajalan

Lah duo banta nyo bajalan
Lah tibo di bawah unduang nan gadang
Lah naiak Mamak si Hetong
Jo si Kasumbo Hampai
Batigo jo si Rawan Pinang
Barampek jo Sidawan
Sarato urang basa-basa
Diiriang urang kayo-kayo
Kononlah urang nan banyak
Habih badiri di halaman
Nan manari lah manari
Nan mamencak lah mamencak
Konon sahari hari nantun
Dari tangah malam
Sakalok tidak dikalokkan
Rintang bagurau-gurau sajo
Asa siang hari barisuak
Habih pulang urang samuonyo
Lah tingga Mamak si Hetong
Batigo baranak
Barampek jo si Rawan Pinang
Kaba baraliah tantang nantun
Sungguah baraliah sanari juo
Alah sabulan duo bulan
Cukuik tigo bulan jo kini

Bakato Mamak si Hetong
Kapado Kasumbo Hampai
"Konon badan kito alah sanang
Nan dimukasuik alah sampai
Nan diama alah pacah
Kok balaya alah sampai ka pulau
Bajalan alah sampai ka bateh
Kini sabuah nan taraso di hati den
Tatkalo maso dahulunyo
Mulo malu ka tabangkik
Mulo kito ka babaua
Dek barakaek rencong
Den salang ka Puti Ameh Manah
Salang balum bakumbalikan
Sasiah pun alun
Sewonyo pun alun
Lah iko laruik lamonyo
Guno urang sudahlah banyak
Jo apo ka pambalehnyo
Bareklah hutang di badan den
Mamintak urang pun balun
Kini bak mano ka eloknyo
Apo ka tenggang kito kini
Jan mak duri dalam dagiang
Kok pi hutang nak manarimo
Kok hutang amaknyo lansai."
Manjawab Kasumbo Hampai,
"Kok itu Tuan katokan
Iyolah dalam bana pulo
Di mano urang ka amuah mamintak
Saganlah inyo maso kini
Kini baitulah
Nan taraso di hati hambo
Lorong kapado bicaro tu
Indaklah dapek di hambo doh
Tuan panggialah **Hakim Perdana**
Tuan barundiang malah jo inyo
Bak apo akan eloknyo
Karano urang cadiak pandai

Uranglah tuo mangakok
Tuan padu malah rundingan
Nak jan jadi hutang
Hutang dari dunia lalu ka akhiraek
Jan kito diupek urang.”

”Salamat bujang janyo den,”
Katonyo Mamak si Hetong
Japuik dang Hakim Perdana besar
Suruah lakeh inyo ka mari.”
Kononlah Salamat bujang
Alun disuruah inyo lah pai
Alun dihimbau inyo lah datang
Bajalan turun sakali bagageh-gageh
Lah balari-lari anjiang
Lah tibo di rumah Hakim Perdana
Duduak manyambah Salamat bujang
Kapado Hakim Perdana,
”Hambo disuruah di Tuanku
Manjapuik samaso kini
Japuik hambo japuik tabawo
Baitu titah hambo junjuang.”

Lah tagak Hakim Perdana
Lalu bajalan sakali
Salamat mangiriang di balakang
Lah tibo di rumah Mak Hetong
Duduak manyambah hanyo lai
Bakato Mamak si Hetong,
”Lai sabuah nan ka den sabuik
Ka Perdana
Tatkalo maso dahuluny o
Tatkalo malu ka tabangkik
Den salang rencong urang
Ka Puti Ameh Manah
Salang alun bakumbalikan
Lah iko muah lamany o
Indak tantu di hambo ka pambaleh
Kok santanny o patuik kito sayua

Kok aluran basasiah kito sasiah
Tolonglah hambo jo bicaro
Kok hutang amaknyo lansai
Jan bak duri dalam dagiang
Kok minun nak sajuak
Kok makan amaknyo kanyang.”

Duduak manakua Hakim Perdana
Dijali rokok sabataang
Dikunyah siriah sakapua
Sadang dapek agak-agak
Sadang datang kiro-kiro
Manyambah Hakim Perdana.
”Ampun hambo di Tuanku
Sakali gawa baribu kali ampun
Baa nan taraso di hati hambo
Kok dalam bana bao lalu
Kok di lua bana disuruikkan
Kok singkek mintak diuleh
Kok panjang Tuanku karek
Kalau lah sarupo itu guno urang
Guno urang ka Tuanku
Sukarlah pulo ka mambaleh
Kok dibaleh jo ameh
Kok hutang alun babayia doh rasonyo
Sabagai lagi dek pandapek hambo
Kok ameh alun ka badaso
Di Aciak Ameh Manah
Sabab inyo urang ado
Urang kayo basunduik-sunduik
Kini baitulah
Nan taraso di hambo
Adopun Aciak Ameh Manah
Kok di lorong ka asanyo
Inyo asa urang patuik
Buliah ka lawan tagak di Tuanku
Santano diuji samo merah
Ditimbang samo barek
Lorong kapado Aciak Ameh Manah

Ambiak sudarolah di Tuanku
Harato saharato
Kamanakan sakamanakan
Adapun Aciak Ameh Manah
Ado baranak surang laki-laki

Banamo Sutan Lembang Alam
Rancak nan ukar alang-alang
Kini karano baban Tuanku
Alun lapeh lai
Tahadok kapado Si Rawan Pinang
Elok kawinkan jo Sutan Lembang Alam
Kok parik amaknyo dalam
Kok kabek amaknyo arek
Kok simpai amaknyo kokoh
Baitu mako tampak kasiah Tuanku
Kok tapuak alah babaleh
Kok hutang alah babayia rasonyo
Sungguah baitu kato hambo
Pulang maklum ka tuanku
Ka barapolah taraso di hambo
Tuanku juo malah nan ka labiah tahu.”

Mandanga kato nan bak kian
Sukolah hati Mamak si Hetong
Lalu bakato hanyo lai,
”Baitulah di Perdana
Himpunkan rakyak samuonyo
Apo nan tidak suruah cari
Kok kabau suruah cakiak
Kok padi suruah tumbuak
Sabagai pulo di Perdana
Pilih urang tukang nan pandai

Tukang bungkuak Magek Mansawi
Pandai manarah manilantang
Pandai marapek dalam aia
Suruah buuk garuda pararakan
Ka panjapuik Sutan Lembang Alam

Ka baa pulo li lai.”

Lah dipalu tabuah larangan
Lah baguguah janang pamanggia
Gumanta tabuah si Hulando
Co bigu tabuah nan banyak
Lah bahimpun urang samuonyo
Gadang ketek tuo mudo
Laki-laki parampuan
Allahu Rabbi banyak urang
Bak anai-anai bubui
Bak kaluang beber patang
Bakato urang nan banyak,
”Ampun Tuanku rajo kami
Apo sabab tabuah dipalu
Apo sabab janang diguguah
Di mano juja nan lapuak
Di mano parik nan tahampa
Di mano dubalang barabuik rampeh
Di mano rando buliah malu
Di mano gadih nan bajuang
Di mano Tuanku salah kitab
Di mano rajo salah hukum
Sangaeklah susah hati kami.”
Manjawab Hakim Perdana,
”Bukannya parik nan tahampa
Bukan dubalang rabuik rampeh
Bukan juaro takuaian
Bukan panghulu lancak hukum
Makonyo tabuah bapalu
Janang pamanggia baguguah
Buliah titah di Tuanku
Himpunkan rakyak nan banyak
Sabuliah bali jo pinto
Salaku kahandak baliau
Cakau kabau di kandang
Urah padi di lumbuang
Antak tabu di lurah
Tabang kayu di rimbo
Kito ka mamancang galanggang

Mangawinkan Si Rawan Pinang
Jo Sutan Lembang Alam
Anak Aciak Ameh Manah
Sabuah lai titah baliau
Kapado Sampono Dunia
Buek garuda pararkan."

Kononlah urang nan banyak
Suko rayo samuonyo
Habih bakarajo siang malam
Nan ka rimbo k
Nan ka rimbo lah ka rimbo
Nan manumbuak alah manumbuak
Kok kabau alah bacakiak
Kok tabu alah baantuak
Lorong kapado Sampono Dunia
Indak suni siang malam
Mambuek garudo pararkan
Lah sahari urang bakarajo
Lah duo hari urang bagarak
Cukuik tigo hari
Garudo alah sudah

Asa siang hari barisuak
Lah bahimpun urang kayo-kayo
Sarato urang mulia-mulia
Rapeklah anak mudo-mudo
Sarato anak sutan-sutan
Di rumah Mamak si Hetong
Bakato Mamak si Hetong,
"O urang nan banyak nangko
Rapek papek kito bajalan
Ka rumah si Ameh Manah
Manjapuik Sutan Lembang Alam
Ka diarak jo garudo
Kini juo kito bajalan
Sataro hari alun tinggi
Sataro paneh alun garang."
Manjawab urang nan banyak,

"Ampunlah kami di Tuanku
Kalau baitu ka baiaknyo
Manuruik kami tantang itu."

Lah turun Mamak si Hetong
Sarato urang nan banyak
Diiriang urang kayo-kayo
Sarato urang mulia-mulia
Sarato tibo Mak Si Hetong di halaman
Tabuah dipalu urang sakali
Buni badia bak marandang kacang
Lah bajalan babondong-bondong
Ka rumah si Ameh Manah
Sarato garudo pararkan
Lah sarantang pajalanan
Lah duo rantang pajalanan
Tibo di sanan
Lah tibo di rumah Ameh Manah
Lah naiak urang samuonyo
Lah duduak urang nan banyak
Lah sudah minun jo makan
Makan siriah sakapua surang
Lah bakisa duduak Sutan Lembang Alam
Ka dalam garudo pararkan
Lah turun urang nan banyak
Sarato marapulai diarak
Badia bahunyi maso itu
Lah lamo inyo di jalan
Tibo di halaman si Rawan Pinang
Babunyi tabuah di balai
Manjawab tabuah di musajik
Ciau bigu tabuah nan banyak
Lah naiak marapulai
Diiriang urang nan banyak
Lah duduak marapulai
Diduduakkan di kasua pandak
Di ateh anjuang nan gadang
Bakato Mamak si Hetong,
Kapado Haji Kaciak Mudo

"Manolah Haji Kaciak Mudo
Adopun makasuik hati hambo
Sarato urang nan banyak ko
Sabuliah bali jo pinto
Lapehkanlah hutang hambo
Kawinkan Si Rawan Pinang
Jo Sutan Lembang Alam."

Lah kawin si Rawan Pinang
Jo Sutan Lembang Alam
Nasi ditatiang hanyo lai
Lah makan urang nan banyak
Makanlah pulo marapulai sakali
Lah salasai minun jo makan
Makan siriah sakapua surang
Hari lah patang hanyo lai
Bakato Hakim Perdana,
"Ampun Tuanku rajo kami
Kok nan dimukasuik alah sampai
Nan diana alah pacah
Karano hari ko alah patang
Nak dibari izin kami
Maurak selo
Pulang ka tampek masiang-masiang."
Lah turun urang nan banyak
Tingga si Rawan Pinang
Jo Sutan Lembang Alam
Kononlah Mamak si Hetong
Jo Kasumbo Hampai
Sangaek suko dalam hati
Karano hutang lah babaya
Lah basanang-sanang diri sajo
Mamarentah dalam nagari
Salamo Mamak si Hetong
Jadi rajo
Urang mamuji samuonyo
Pangasiah panyayang ka rakaek
Barakaek Allah batolong padonyo
Anak buah sanang taranak manjadi.

DAFTAR PUSTAKA

- Kaba Mamak si Hetong : Eene Minangkabausche Vertelling.* 1982.
Leiden : PWM Trap.
- Nasrun, M. 1971. *Dasar Falsafah Adat Minangkabau.* Jakarta;
Bulan Bintang, cetakan II.
- Pangaduan, Sutan. t.t. *Kaba Magek Manandin.* Bukittinggi : Tsamaratulichwan, cetakan XI.
t.t. *Kaba Untung Sudah.* Bukittinggi: Tsamaratulichwan,
cetakan IX.
- Payakumbuh, Ilyas. t.t. *Si Umbuik Mudo dengan Puti Galang Ba-
nyak.* Bukittinggi : CV Pustaka Indonesia.
- Zainal, Baharuddin. 1975. *Mendekati Kesusastraan.* Kuala Lum-
pur : Dewan Bahasa dan Pustaka.

КАНДАМАК СИНЕТОНГ

Perpustakaan
Jenderal K.

899.2

E



BALAI PUSTAKA — JAKARTA